

9  
10  
THESES  
THEOLOGICO-POLEMICO-CRITICÆ

Q U A S

D. ARNALDUS SONZONIUS MEDIOLANENSIS

SACRI CISTERCIENSIS ORDINIS MONACHUS, ET IN COLLEGIO S. CRUCIS  
IN JERUSALEM DE URBE THEOLOGICÆ AUDITOR

PUBLICÆ DEFENDENDAS PROPO-  
NIT ASSISTENTIBUS

*Admodum RR. PP. D.*

HILARIONE NAVA

ET D.

ANGELO FUMAGALLI

*In eodem Collegio Sacræ Theologiæ Lectoribus.*



ROMÆ MDCCCLXVI.

EX TYPOGRAPHIA CAROLI BARBIELLINI

PRÆSIDUM FACULTATE.





## *Ex Sacra Scriptura.*

I. **P**LURES antiqua, plures itidem nostra hæc ætas tulit, eosque impios, ac perditæ conscientiæ viros, qui sola naturali ratione suffulti, eaque singula dimetientes, Divinam revelationem omnem prorsus eliminarunt. Perverso huic, ac pernicioso errori, ex quo infiniti ferme alii, veluti ex eorum radice pullulant errores, totis nîsibus occurrimus, ostendentes folam naturalem Religionem sufficere haud posse, sed Divinam aliquam revelationem necessariam insuper fore, quæ in iis, quæ Dei sunt, nos instruat, dirigatque ad finem illum, quem Deus ipse nobis constituit, allequendum.

II. Hæc porro Divina revelatio in Sacra Scriptura præsertim continetur, cujus nomine nihil aliud venit, nisi ipsum Verbum Dei scriptum; quod proinde revera existere, Divinæque auctoritatis esse profiteamur, illudque iis in Libris contineri asserimus, quos Sacræ Scripturæ nomine insignitos Fidelibus suis Catholica proponit Ecclesia. Libros hoscæ tanta animi devotione suscipimus, ut ne dum res, & sententias in iis contentas peculiari Spiritus Sancti afflatu, & assistentia ab eorum Scriptoribus credamus exaratas, quod Catholici omnes adversus Heterodoxos defendunt, verum etiam singula verba ab eodem spiritu dictata fuisse contra nonnullos Catholicos propugnemus.

III. Plures sunt Scripturæ Sacræ Libri, quorum alii ad Vetus, ad Novum alii pertinent Testamentum; de quorum propterea numero, & auctoritate, ne qua dubitandi, errandive subesse posset occasio, certum Canonem edendum curavit Ecclesia, quo Libris Divinis tantum exhibitis, Pseudo-Canonici a Canonicis secernerentur. Singulorum hic Auctorem, ætatemque, qua scripti sunt, & canonicam eorum auctoritatem, quod res longioris sit indaginis, expendere non vacat. Ex omnibus itaque Pentateuchum seligimus, Epistolam ad Hebræos, & Apocalypsim, in quibus exerceamur. Circa Pentateuchum explodimus sicuti Obbesii, Peirerii, & Spinossæ opinionationes, ita etiam Riccardi Simonii systema; Epistolam vero ad Hebræos Apostolo Paulo vindicamus, & Joanni Evangelistæ Apocalypseos librum. Circa reliquos Scripturæ Libros eum amplectimur, ac tuemur Canonem, quem post accuratum examen Tridentina Synodus sess. 4. cap. 1. determinavit.

IV. Hebræorum Canon nec plures, nec pauciores quam viginti duos complectitur Libros. Canonem hunc, qui unicus fuit ante Christi tempora, Esdras condidit; non eo tamen sensu ipse condidit, quod Sacros Libros, vel in excidio Hierosolymitano a Chaldeis penitus incensos, vel

2  
vel in Babylonica captivitate deperditos, Spiritu Sancto dictante de novo conscripserit, ut aliqui comminiscuntur; sed quod eos unice collegerit dissipatos, atque in certum ordinem disposuerit, castigatis iis codicibus, in quos vitium aliquod, mendamque irrepserat.

V. Illud veluti certum habemus Libros Veteris Testamenti, qui in antiquo Judæorum Canone exhibentur, Hebraica lingua scriptos primum fuisse, uno Daniele excepto. Ex Libris vero, quos Ecclesia Christiana addidit Judæorum Canon, quosdam Hebraico, alios Chaldaico, nonnullos demum Græco idiomate fuisse exaratos, tamquam certum pariter habemus. Ad Libros autem Novi Testamenti, quod spectat, si unum, vel alterum excipias, eos fuisse Græcè descriptos asserimus. Porro textus Hebraeus Librorum Veteris Testamenti numquam a Judæis de industria mutilatus fuit, vel corruptus in iis, quem Fidem respiciant, vel mores. Fatendum est tamen hujus textus puritatem successu temporis, ex quibusdam, quæ in illum irrepserunt, erratis & mendis, levioribus licet, nonnihil vitii contraxisse.

VI. Ex pluribus, quæ temporum decursu prodierunt Sacræ Scripturæ, versionibus Græcæ, celeberrima fuit, & inter ceteras principem obtinuit locum. Versionem hanc a septuaginta duobus Judæis editam fuisse defendimus, ad Ptolomæum Philadelphum, ejus conficiendæ causâ missis ab Eleazaro Summo Sacerdote, ut refert Aristæas, qui totam hujus Versionis historiam luculenter descripsit. Hanc quidem nonnulli ex recentioribus Criticis inter Judæorum fabulas & somnia amandant, illius vero Auctorem tamquam supposititium traducunt. Ex eorum tamen argumentis, si quid sapimus, illud tantum evinci posse putamus, Aristææ libellum, quibusdam in locis falsatum fuisse: quod valde probabile est; non autem quoad substantiam, supposititium esse, vel ex integro ab Inpositore aliquo confictum. Narratio itaque de versione septuaginta Interpretum, quam Aristæas tradit, ut vera quoad substantiam habenda est.

VII. Inter ea, quæ Aristææ libello aliena manu assuta fortasse fuere, connumerari illud potest, siue quod de singulis Cellulis refertur, in quibus adornandæ versionis Interpretes illi separatim incubuerint, siue quod fuerint vates: quæ ii prærogativæ ibidem insigniuntur. Utrumque enim cum Hieronymo jure denegari potest. Eos tamen non Pentateuchum solum, ut nonnullis placet, sed omnes veteris Testamenti Libros, qui in Hebræorum Canone tunc erant, vertisse arbitramur. Hæc autem versio, utpote Apostolorum usu consecrata, & communi Patrum laudata suffragio, prioribus Ecclesiæ sæculis eam obtinuit auctoritatem, ut tamquam Sacra, & Canonica ab omnibus passim reciperetur.

VIII. At inter Latinas versiones illa potissimum excellit olim, quam Augustinus Italiam, Hieronymus Vulgatam, Gregorius Magnus Veterem appellarunt. Nostra tamen ætate sola, Vulgata Latina authentica est, & Fidei, morumque regula certissima, quod a Tridentina Synodo sess. 4. definitum fuit.

IX. Infans prorsus aguntur furore Heterodoxi, dum conviciis, & diceriis tum Vulgatam, cum Ecclesiam impetere non verentur, illam corruptionis, hanc tyrannidis calumniantes. Quæ enim obtinet modo vulgata versio, longo sæculorum usu in ipsa Ecclesia probata est, ut inquit Tridentinum Concilium; quod tamen, quum pro Authentica hanc esse habendam decernit, quidquam propterea detractum voluit siue de Hebræorum, siue de Græcorum Codicum auctoritate: sed illud unice declarat nihil quod Fidei, ac Religioni contrarium sit, in Vulgata nostra contineri: proindeque eam ad dirimendas Fidei, morumve controversias regulam esse tutissimam.

X. Scriptura Sacra, licet in aliquibus clara sit, & perspicua, in pluribus tamen est obscura. Quare ridendi potius, quam confutandi videntur Protestantés, dum eam intellectu ubique facilem, omnibus claram, & perviam esse temere effutiant. Cur intanta, quam Scripturis attribunt luce, & claritate eorum oculi tam sæpe caligant? quod tamen sibi met ipsis nonnumquam contingere, nolentes licet & inviti, fateri coguntur. Igitur Scriptura nequit se sola esse controversiarum Fidei Judex, multo minus spiritus privatus, aut Sæcularis Princeps; sed privilegium hocce soli reservatum est Ecclesiæ, cui Christus Dominus dedit ortas de rebus Fidei controversias supremo suo, ac infallibili judicio dirimere, ac terminare.

DE

## De Traditionibus .

I. **T**raditionis nomine nil aliud venit , quam Doctrina sine Scriptura tradita : sine Scriptura , in quam , Divina , & Canonica , nam in SS. Patrum Operibus , & Conciliorum Actis Traditiones servantur . Traditio porro alia Divina est , quæ Deum , seu Christum habet Auctorem , humana altera , quæ ab hominibus derivat . Hæc rursus duplex est , Apostolica ; nempe , quæ suam ab Apostolis originem ducit , & Ecclesiastica , quæ initium sumit a Successoribus Apostolorum , qui similiter spectari possunt , vel ut Præcones eorum , quæ a Christo audierunt , vel ut Ecclesiæ Pastores aliquid propria auctoritate statuentes . Quæ priori tradiderunt modo , ea sunt Traditionis Divinæ , quæ altero , Traditionis censentur Apostolicæ .

II. Recentiores Hæretici , veterum Hæreticorum vestigiis inhærentes nullam prorsus esse Divinam Traditionem autumant , nullumque inde desumi posse pro Fide , & moribus infallibile argumentum . At a veritate longissime eos aberrare contendimus ostendentes dari Traditiones aliquas vere Divinas , quibus Fides , moresque firmiter fulciantur . Hujus generis Traditiones pari pietatis affectu , ac reverentia , qua Libros canonicos , suscipimus , ac veneramur .

III. Quando quidem Hæretici ad vim harum Traditionum elevandam passim , fidenterque jactitare solent veras a falsis , Divinas ab humanis fecerim nullatenus posse ; ut omnem idcirco cavillandi aditum eis præcludamus , multiplices statuimus regulas , easque certissimas , quarum ope veræ a falsis , Divinæ ab humanis rite distinguantur .

## De Ecclesia .

I. **V**era Christi Ecclesia in terris militans optime definitur , Societas , vel Cætus hominum quorum una , & eadem est in Fide Christiana professio , & in Sacramentis communio , idemque sub legitimis Pastoribus , & sub uno præsertim supremo ac visibili capite Romano Pontifice regimen . Mox traditam definitionem immerito novitatis eo ex capite acculat Lathojus , quod mentio in ipsa fiat subjectionis legitimis Pastoribus deferendæ .

II. Aliam , & inque a recensita prorsus diversam Ecclesiæ notionem sibi efformarunt veteres , recentioresque Acatholici , quorum aliqui illam vel congregationem esse hominum perfectorum , aut Juulorum , ut olim Pelagiani , Novatiani , & Donatistæ , vel Societatem tantum Prædestinatorum , ut post Wiclephum , Calvinus , & alii statuerunt . Falso tamen , & absurdè : cum Ecclesia , quam sub variis figuris vel agri , vel aræ , aut sagenæ Scriptura adumbrat , Justos , & Peccatores , Reprobos , & Electos , Perfectos & Imperfectos complecti evincatur .

III. In hac ipsa Ecclesia nullo modo locum habent Hæretici , qui tamen publici sint , & manifesti , secus vero ii , qui suum occultant errorem . Ab ea pariter excluduntur , quemadmodum vere Schismatici , ita etiam publice excommunicati , quos constat membra esse a Christi Corpore , quod est Ecclesia , penitus abscissa . Neque Novatorum aliter opinantium causam juvare potest excogitata a Jurio fundamentalium , & non fundamentalium Fidei articulorum distinctio , quæ merum est , putumque ipsius commentum Scripturæ , & veterum Patrum traditioni aperte contrarium .

IV. Et si vel ipforum Novatorum consensu certæ quædam , notæ admitti debent , quarum ope vera Christi Ecclesia a quacumque alia hominum societate , quæ vel ipsam mentitur , vel aliquam cum ea habet similitudinem , tuto secerni queat ; quas tamen assignant Novatores , merito improbant Catholici omnes . Doctrinæ quippe veritas , & legitimus Sacramentorum usus , ut ut a Christi Ecclesia inseparabiles , perperam tamen inter ejus dignoscendæ notas ab Hæreticis collocantur .

4 V. Veræ igitur Ecclesiæ notæ, quatuor illæ sunt, quæ a Symbolo Constantinopolitano recensentur his verbis. *Credo . . . Unam, Sanctam, Catholicam, & Apostolicam Ecclesiam.* Hæ conjunctim sumptæ veram Christi Ecclesiam a quibuslibet Hæreticorum societatibus positive distinguunt; quælibet vero earum seorsim accepta, negative distinguit, sive sensibilibiter demonstrant societatem illam, quæ aliqua ex recensitis notis destituatur, veram non esse Christi Ecclesiam. Soli autem Romanæ Ecclesiæ has notas competere, ille tantum negare potest, qui apertæ veritati refragari non veretur.

VI. Præter assignatas notas, tres etiam habet Ecclesia insignes proprietates a Christo acceptas, ut videlicet visibilis semper sit, Indefectibilis, atque Infallibilis. Ecclesia igitur per Orbem universum diffusa, sive sumpta pro universitate Fidelium, sive pro universitate Pastorum, in rebus Fidei & morum, nunquam nequidem grassantis Arianismi tempore erravit. sed nec errare umquam potest.

## De Conciliis.

I. Concilium, sive Synodus est Congregatio Præfulum Ecclesiæ, qui legitima auctoritate simul convenerint ad pertractandum de Ecclesiasticis, iisque gravioris momenti rebus cujusmodi sunt, quæ vel ad Fidem, vel ad mores, vel ad Disciplinam pertinent. Ex Conciliis autem aliud est Generale, aliud Nationale, aliud Provinciale, aliud denique Diocesanum.

II. Conciliorum usus non in humano tantum jure fundatur, sed in Verbo Dei tum scripto, tum tradito. Quare audiendi non sunt, qui illorum institutionem & usum tamquam merum humanum inventum traducunt. Quamquam vero omnia Concilia, cujuscumque demum sint generis, maximæ esse utilitatis non inficiemur, ut suaviori quodam modo veritas suaderi Fidelibus possit; nulla tamen in genere, sed tantum in specie necessaria esse contendimus.

III. Jus Generalia convocandi Concilia soli competit Romano Pontifici; quapropter nisi ab ipso convocetur Concilium, vel ab alio de ejus consensu, & auctoritate, aut saltem nisi convocatio ab alio facta, rata ab eodem habeatur, illud Œcumenicum, seu Generale nec esse, nec haberi potest. Errant itaque Magdeburgenses, dum hoc jure Summum Pontificem spoliant, ut illud transferant in Imperatorem.

IV. Solius pariter Romani Pontificis jus est Œcumenico præsidendi Concilio, vel per se, vel per suos Legatos, quidquid in contrarium blaterent Lutherus, & Calvinus, contententes hujuscemodi jus ad Imperatores pertinere. Hi sane, si quando præfuere Conciliis, præfuerunt tantum, quoad locum, ut ajunt, materialem, & concordia in iis servandæ causâ, non vero quoad potestatem præscribendarum ibidem rerum, ferendive definitivi suffragii; quo jure ex institutione Divina donatur Summus Pontifex in primis, tum ceteri etiam, imo soli Episcopi: ex Ecclesiæ tamen privilegio hoc eodem jure gaudent etiam Cardinales, Abbates, & Generales Ordinum Regularium Præfules, licet Episcopali Ordine non insigniantur.

V. Concilia Generalia, quibus nullæ desint requisitæ a Catholicis conditiones, infallibilis sunt auctoritatis; unde desumptum ex eis pro Fide, vel moribus argumentum, ut certum habeatur necesse est. Ex harum conditionum defectu, Pisani Concilium Anno 1409. celebratum ad tollendum Schisma Gregorium XII. inter, & Benedictum XIII. a numero Œcumenicorum Conciliorum expungi debet.

## De Romano Pontifice :

I. Quum ea, quæ Romano Pontifici competunt, jura, & privilegia, non aliunde ipse habeat, nisi quia legitimus est Petri Successor; præstat idcirco hujus Primatum, potestatemque prius determinare. Censemus itaque in primis Christum Dominum, ne dum honoris, & dignitatis prærogativam, verum etiam potestatis, & jurisdictionis Primatum supra ceteros Apostolos contulisse Petro, eumque post se Vicarium, & totius Ecclesiæ supremum Caput, & Pastorem constituisse.

II. Postquam Antiochenam S. Petrus fundavit, rexitque ad tempus Ecclesiam, Romam profectus est, ubi suam constituit Sedem, in eaque Urbe Episcopatum tenens ad mortem usque permansit; quod non sine superni dispositione consilii contigisse putandum est. Nec quidquam veritati hujus ad Urbem adventus detrahunt, quæ a Novatoribus congeri solent: hæc enim a Nobis haud difficulter diluuntur.

III. Sed quo nam præcise Anno S. Petrus Romam primum advenit? Quidquid critici alii circa rem hanc opinentur, nostra sententia est Anno Imperii Claudii secundo, eum Romam venisse, ubi 25. annorum spatio sedem tenuit suam.

IV. Quum auctoritas, quam Petro contulit Christus, ita illi fuerit collata, ut non tantum in ipsius resideret, desineretque persona, sed post ejus mortem adhuc perduraret ad Successores suos transmittenda; quumque Romani Pontifices, legitimi sint S. Petri in juribus & privilegiis Successores, recta inde sequitur eos nedum honoris, & dignitatis, verum etiam potestatis, & jurisdictionis Primatum in reliquos omnes Ecclesiæ Episcopos jure Divino obtinere.

V. Quem Primatum in omnes Episcopos habet Romanus Pontifex, in eos habet etiam in Œcumenico Concilio congregatos, in quo auctoritate, & jurisdictione præest, sicuti & iudicandi, definiendique potestate. Frustra vero Romanum Pontificem Generali Concilio subiacere conantur aliqui ex factis Concilii Pisani, vel Constantiensis, sess. 4. & 5. vel denique Basileensis, ex quibus nihil contra Pontificiam auctoritatem colligi posse pluribus demonstramus.

VI. Præter recensitas Dotes, quæ a Petro ad Romanos Pontifices derivarunt, alia insuper ex eadem origine eis accessit, iudicii nempe infallibilitas, qua sit, ut quoties ipsi ex Cathedra, ut dici solet, ea definiunt, quæ ad Fidem, vel mores pertinent, etiam extra Generale Concilium, errare nullatenus possint. Hæc autem eorum definitio debet infallibilis censeri auctoritatis, etiam ante præstitum ei ab Ecclesia consensum.

VII. Qui tam præclarum Infallibilitatis privilegium Romanæ Sedi invident, toti sunt in conquirendis undique ex Ecclesiastica Historia monumentis, quibus probari posse existimant Romanos Pontifices in Fidei definitionibus hac Infallibilitate destitui. Operam tamen eos perdere arbitramur, cum nullus ex Romanis Pontificibus ostendi possit in hisce definitionibus fereendis a Catholica fide revera defcivisse, non Victor, non Stephanus, non Liberius, aut Zosimus, aut Honorius, vel Marcellinus (cujus factum inter Donatistarum commenta amandamus) non denique alius eorum quicumque; quos omnes a qualibet erroris, & hæreseos labee immunes, prorsus fuisse contendimus. Ad factum quod attinet Vigilii in causa Trium Capitulorum, nil aliud potest inferri ex contrariis ab ipso editis rescriptis, quam pro diversis temporum circumstantiis, diversa quidem, prudenti tamen laudabilique Œconomia eum usum fuisse.

## *De Sanctis Ecclesiæ Patribus.*

**I.** **N**omine Sanctorum Ecclesiæ Patrum, eos juxta communem acceptionem intelligimus, quos in rebus Fidei, & morum tamquam Magistros suspexit antiquitas. Hos inter nonnulli fuere sola antiquitate, & doctrina illustres, plurimi vero Sanctitate etiam conspici: ab utrisque ea, quæ Traditionis sunt, hauriri debent, sed ab iis potissimum, quos ut Sanctos colit Ecclesiæ.

II. Unius tamen, vel alterius Patris de hisce rebus sententia, aliis tacentibus, firmum non ministrat argumentum; plurium vero Patrum opinio, aliis ex altera parte licet paucioribus reclamantibus, valde quidem probabile, at non omnino certum: sed certissimum & infallibile id habebitur, si unanimis eorum accedat in dogma aliquod consensus, cui proinde absque piaculo refragari non licet.

## *De Deo, ejusque Attributis.*

**I.** **P**erspiciue adeo ostendit se Deus in operibus suis, totque, & tanta sunt argumenta sive metaphysica, sive physica, sive moralia, quibus supremi Numinis existentia comprobatur, ut meridiana in luce cæcutire dicendi sint quotquot eam vel inficiari, vel in dubium revocare non verentur. Quin, & mirari subit aliquos extitisse Theologos, qui invincibilem ipsius Dei ignorantiam in homine rationis compote possibilem asserere non dubitaverint.

II. Exigit Dei conceptus, atque natura perfectionum omnium cunululum: quapropter ita unus est Deus, ut alterius consortium penitus excludat. Execramur itaque Paganorum, Valentini, Prodi, Cerdonis, Manetis, aliorumque Polytheorum insaniam.

III. Simplicissimus pariter est Deus, & cujuscumque compositionis experts. Proprietatem hanc Deo adjudicarunt veteres quotquot, qui Deum ipsum cum Universi substantia pessime, confundebant. Istorum deliria, temerario ausu, & irrito, renovare, ac geometrica methodo confirmare conatus est Benedictus Spinoza certo quodam concinnato systemate, quod ne dum a Religionis, verum etiam ab omni rationis sensu penitus abhorret.

IV. Supinus fuit Antropomorphitarum error Deum humano corpore, & membris præditum inelamantium. Ab hoc errore, quidquid aliis visum fuerit, immunes fuisse remur Melitonem Sardanensem Episcopum, & Audium. Tertullianum itidem, licet minus castigate de Dei simplicitate locutus sit, tamen ab Antropomorphitarum hæresi alienum ducimus: Epiphanium vero, nonnisi per meram calumniam, in tam crassi erroris suspicionem vocari posse contendimus.

V. Ne dum ita simplicem Deum asserimus, ut eum Spiritum dicamus ab omni materiæ admixtione purissimum; sed etiam ut quamlibet realem intrinsecam distinctionem inter essentiam, & attributa, vel inter attributa ipsa, quarum alterutram Gualterus, Palamita, Sociniani, alique Hæretici commenti sunt, omnino excludat. Refugimus etiam Aetii, & Eunomii errorem: dissidemus a Nominalibus; & eam inter divina attributa distinctionem admittimus, quam rationis ratiocinatur, & virtualem thomisticam appellant.

VI. Perfectissime simplicitati proxima est, & necessario connexa summa Dei Immutabilitas, quam Deo convenire tuemur etiam quoad decreta libera, quæ creaturas respiciunt: & licet in concilianda Dei libertate cum ejusdem Immutabilitate multum caliget, & hæreat humana ratio: utriusque tamen perfectionis consortium in eodem simplicissimo Ente minime repugnare asserimus.

VII. Ubique Deus adest immensitate substantiæ suæ non sola scientia, & potestate, ut cum Vorstio blaterant Sociniani, contra quos catholicum dogma unice tueri contenti sumus, quin modum



modum quo Deus immensitate sua rebus omnibus intime præsens est, curiosius investigemus.

VIII. Solus Deus æternitate propriè dicta, qua semper idem est, & permanens a sæculo usque in sæculum; principio caret, & fine, & temporum successionem excludit.

IX. Dementer nimis Beguardi, & Beguinæ post Aetium, & Eunomium jactarunt se tam perfecte infinitam Dei essentiam comprehendere, sicuti Deus semetipsum comprehendit: equidem, si de comprehensione stricte sumpta sermo sit, adeo incomprehensibilis est Deus, ut a nullo intellectu creato, nequidem lumine gloriæ adjuvante, comprehendere possit.

X. Errarunt exopposito Palamitæ, aliique, si qui fuerunt ejusdem opinionis homines, intuitivam Dei visionem absolute impossibilem statuentes: utcumque enim corporis oculis nec visus sit unquam Deus, nec videri possit; utcumque creata mens visionem hanc per solas naturæ vires assequi minime valeat; eandem tamen obtinere potest, si Dei illustratione, & auxilio roboretur.

XI. Intuitivam hujusmodi visionem, nulli quidem hominum viatorum, ne Moysæ, vel Pauli excepto, concessam fuisse defendimus: bene vero, exploso Millenariorum regno, & rejectis Heterodoxorum signentis circa dilationem gloriæ usque ad extremam judicii diem, ea incunctanter ab obitu donari dicimus piorum Animas, quibus nihil post mortem luendum superest. Tantum autem abest ut circa hoc dogma Hæreticorum partes juverit S. P. N. Bernardus, quem admodum, S. Doctoris sensu penitus non inspecto, immerito prorsus causantur nonnulli, quod e contra aptissima sit ejus authoritas ad Catholicam veritatem firmandam.

XII. Iis vero animabus, quibus a corpore solutis aliquid adhuc expiandum remanet, tamdiu differtur intuitiva Dei visio, quamdiu Purgatorii pænis, quæ mitiores, & breviores viventium suffragiis reddi possunt, penitus expurgatæ fuerint.

## De Mystério SS. Trinitatis.

I. **M**ysteriorum omnium profundissimum Augusta Trinitas, Fidei, ac professionis ejus, qua Christiani sumus, caput præcipuum, unam Divinam complectens essentiam in Tribus distinctis personis subsistentem, sine ulla vel separatione substantiæ, vel confusione personæ, adeo sublime est, atque humano captui impervium, ut nulla humana ratione, supposita etiam illius revelatione, valeat demonstrari.

II. Dari in Deo tres personas non nomine tantum, sed realiter inter se distinctas in una, eademque numerica natura, seu essentia, plura sunt per totum, sed maxime Novi fœderis contextum sparsa testimonia, eaque disertissima, quæ utramque Catholicam veritatem luculenter ostendunt.

III. In tanta momentorum copia illud potissimum obtinet, quod in epist. 1. S. Joannis cap. 5. vers. 7. legitur. *Tres sunt, qui testimonium dant, in Cælo, Pater, Verbum, & Spiritus Sanctus, & hi tres unum sunt.* Neque hujus textus sinceritatem dubiam reddere possunt, quæcumque ad elevandam ipsius fidem congerunt intemperantioris Critices Homines. Varia siquidem priscorum codicum lectio, nonnullorum Patrum silentium, paucorumque eruditorum dubitationes tanti non sunt, ut probent peregrina manu Joannis epistolæ fuisse insertum, si cum aliis comparentur, quæ illum, tamquam germanum S. Evangelistæ fœtum, suo vindicant Auctori.

IV. Verbi divinitatem, ejusque cum Patre consubstantialitatem innumera ferme Divinarum Scripturarum testimonia evincunt; Nemo tamen disertius rem hanc probat laudato Joanne Apostolo, cujus potissimum testimoniis refelluntur quotquot Verbum a Divina substantia fecere extraneum, & in creaturarum sortem blasphemii deprecere.

V. Quod ex omni Patrum numero, qui Nicænâ Synodum præfessere, plerique minus propriè, minusque caute de Verbi Divinitate quædam interdum scripsisse videantur, eorum probant testimonia, quæ in suspensionem violatæ Fidei venerunt. Verum id dandum est illorum

temporum circumstantiis, quæ adeo castigatum non exigebant loquendi modum. *Securi loquebantur*, inquit Augustinus, *cum nullus adesset hostis*. Id etiam in quamdam æconomiam, primis illis Christianæ Religionis temporibus non incongruam referri potest. Ceterum illorum aliquem Arianis præfuisse, a vero distat, quam quod maxime.

VI. Integra in primis est circa Verbi divinitatem Iulini doctrina; quæ satis se prodit sive in secunda pro Christianis Apologia, sive in disputatione, quam Ephesi habuit cum Triphone Judæorum sua ætate doctissimo. Incorruptæ Iulini Fidei apprime respondeat, quæ de eodem Verbo scriptis suis consignavit Irenæus. Ab hoc illustri Anticæcænorum Scriptorum cœtu, qui orthodoxam de Trinitate fidem professi sunt, sejungendus non est Tertullianus.

VII. Duriora sunt Origenis verba, quam ut emolliiri queant, & ad catholicum sensum inflecti; verum quum quædam Origenis opera Hæreticorum Hominum invidiæ patuerint, eorumque corruptelæ fuerint obnoxia, mirum non est, si in plerisque non pauca occurrant impie dicta, quæque christianas aures graviter offendunt. Si igitur ex iis germanus Origenis sensus esset eruendus, haud dubium, quin ipse ad Heterodoxorum partes, vel invitatus traheretur, Quod si ad erudita alia ingenii ejus monumenta, quæ ætate jam valde maturus opposuit Cælo, quæque iudubitata sunt fidei, nullisque fædatis mendis, provocemus, sua erit hac in parte Origenianæ doctrinæ integritas. Ad corruptos ejus fatus potissimum respexit censendi sunt, qui illum veluti male de Verbi Divinitate sentientem traduxerunt.

VIII. Jure proinde Ariana Hæresis in Nicæna Synodo fuit damnata, atque vocabulum *homocon* rectissime usurparunt Nicæni Præsules ad designandam Verbi Divinitatem, ac perfectam cum Patre æqualitatem; tum illud veluti tesseram merito haberi voluerunt, quo uno malignantium Hominum perfidiæ omnis tergiversandi via præcludi, atque Hæresis omni ex parte contereri posset.

IX. Ab hac tamen orthodoxa de Verbi consubstantialitate doctrina, & fide descivit Eusebius Cæsariensis Vir ceteroquin multiplicis eruditionis genere conspicuus. Antistitem hunc Arianae impietatis accusant non tam arctissimum, quod cum Arianis inerat amicitia fædus, quorum partes non semel adjuvit, & sua promovit auctoritate; quam perversa dogmata, quæ de Verbi Divinitate, etiam post Nicæni Concilii decretum suis inseruit scriptis. Illa autem alia sunt, ut nec benigna interpretatione temperari possint, nec ad sentum Nicænae fidei detorqueri. Frustra proinde infudarunt Socrates, Valesius, ut ab eo quamlibet hæreseos notam adimerent.

X. Liberius Summus Pontifex, quem pro fide catholica plura contra Arianos egisse constat, Fidei formulæ sibi ab iisdem Hæreticis oblatae subscribens, nusquam Arianae perfidiæ consensit, aut Catholicam ejuravit fidem: Formula namque, cui ipse subscripsit ex tribus, quæ Symmii editæ sunt, prima fuit, eaque catholica, non autem secunda, ut putant nonnulli, qui de Liberii orthodoxia nimis dure, minusque recte judicarunt. Neque ipsis suffragantur, quæ de Felice II. asseruntur: nostra siquidem sententia est eum numquam fuisse legitimum Pontificem.

XI. Patres similiter in Ariminensi Concilio congregati, subscribendo Formulæ sibi ab Arianis Viris Ursacio, & Valente exhibitæ, Ariano veneno infecti non fuerunt, quum bono animo, rectoque sine tali subscripserint Formulæ, quæ secundum extimam verborum superficiem spectata nihil hæreticum exhibebat, quamvis juxta Auctorum mentem, & consilium inspecta, captiosa foret, & hæretica.

XII. Quam obtinet Filius cum Patre Divinam naturam, eandem cum Patre & Filio indivisam habet Spiritus Sanctus, non æterna natus generatione, sed ex utroque ab omni æternitate procedens. Divinitatem Spiritus Sancti contra Macedonianos, ceterosque Pneumatomachos, Alexandrina primum, Athanasio Præsidente, inde Romana sub Damaso, tum Constantinopolitana Synodus asseruere.

XIII. Ad compescendum grassantem Schismaticorum errorem de negata Spiritus Sancti processione

sione a Filio, atque ad extinguendam succrescentem in dies novæ hæreseos doctrinam, insertum est Constantinopolitano Symbolo vox *Filioque*. Ejusmodi additionem, seu potius Orthodoxæ Fidei uberiorem expositionem ea, quæ præstat auctoritate, jure interpolavit Occidentalis Ecclesiæ, urgentibus potissimum circumstantiis, in quibus versabatur. Quare immerito Romanis exprobrant, criminique vertunt Græci, quod vocis illius additamento Fidei Symbolum interpolaverint. Circa epocam tamen additionis hujus, alios malumus audire, quam nostrum ferre judicium.

XIV. Admittendas esse in Deo veras, & reales, immanentisque processiones, cum Ethnicis & Judæis Sabelliani, & Ariani pertinaciter negant. At oppositum ex innumeris pene scripturæ, & Patrum testimoniis invictè demonstratur.

XV. Porro hujusmodi processiones duæ tantum sunt, nec plures, nec pauciores: una Verbi quæ dicitur, & est generatio; altera Spiritus Sancti, quæ generatio non est, sed simplex appellatur processio. Hujus discriminis evidens ratio nobis non innotescit, quum ad hæc usque tempora, nulla, quæ plene, & integre satisfaciatur, assignata fuerit causa: suppositis tamen communioris Philosophiæ principiis, satis apta illa videtur, quod solum Verbum procedat ut Filius, quia procedendo per intellectum, procedit secundum rationem similitudinis, quæ ad propriam generationem requiritur; non ita Spiritus Sanctus, Divinæ impulsu voluntati procedens.

## *De Divini Verbi Incarnatione.*

I. Altissimum, & a sæculis absconditum Divinæ Incarnationis mysterium, quo Verbum citra ullam sui mutationem, pro nobis caro factum est, jam pridem in Jesu Nazareno impletum fuisse, pluribus argumentis tam contra Judæos, quam contra Gentiles ostendimus.

II. Inter cetera quibus ad Judæorum perfidiam revincendam utimur, & probandum Jesum verum esse Messiam Prophetarum oraculis prænuntiatum, unum desumimus ex Jacobi vaticinio Gen. 49., alterum ex Danielis prophetia cap. 9. In Jacobeo vaticinio nomine Judæ non universum Israeliticum Populum, sed peculiarem dumtaxat hujus nominis Tribum designari arbitramur: Danielis autem hebdomadas ab anno xx. Artaxerxis auspicias dicimus.

III. Eosdem Judæos refellimus etiam domestico, & minime suspecto testimonio de Christo & Messia, quod habent apud Josephum lib. 18. antiquit. Judaic. cap. 4., quod genuinum esse illius Authoris factum contra Osiandrum, Gifanium, Montacutium, Capellum, Tanaquillum Fabrum, aliosque intemperantiores Criticos, tum ex græcæ phræseos hujus testimonii, cum Flaviano stylo conformitate, tum pluribus aliis aliunde desumptis momentis comprobamus.

IV. Adversus Ethnicos, ultra argumenta, quæ ex Miraculis, Prophetiarum in Christo adimplemento, aliisque fontibus derivantur, illud etiam urgemus, quod Pilati Acta ad Tiberium Cæsarem missa suppeditant. Licet enim ea nunc excidisse probabilius sit; tamen & scripta fuisse & præclarum christianæ fidei testimonium reddidisse non dubitamus.

V. In consignando anno Christi natalitio, nunc temporis etiam in varias partes scinduntur peritiores Chronologi. Nos illis adhærendum censuimus qui Christi Natale collocant in anno Periodi Julianæ 4709., quadriennio ante æram vulgarem, Cons. Augusto XII. & Sulla.

VI. Divinum Infantem recens natum suscepit Beatissima Virgo, & pannis involutum reclinauit in Præsepio, ubi Bovem, & Asinum accubuisse signum non est ab Authore libri de Divinis promissionibus inductum, & Pictorum industria propagatum, ut nonnullis visum fuit, sed opinio, quæ a tertio Ecclesiæ sæculo invaluisse probatur.

VII. Sexta Januarii die, ex Arabia Felice ad Christi incunabula accedentes Magi, natum humani generis Redemptorem tanquam Deum simul, & hominem, religioso, ac Patriæ cultu procumbentes adorarunt: atque nonnisi temere, & contra constantem Patrum traditionem adori-

adorationem hanc Christo a Magis exhibitam Author versionis Gallicæ Bibliorum typis Trevoltiensibus cussæ, ejusque Apologista ad cultum mere civilem referunt, & apud Orientales in more positum.

VIII. Verbum divinum solidum corpus, & veram humanam carnem assumpsit, quam non è Cælo, non aliunde, sed, operante Spiritu S. materna traxit ex carne. Dum Christum Mariæ virginali concepit utero, & fudit partu, novo prorsus inauditoque prodigio & Mater fuit, & Virgo tam ante partum, quam in partu, quam post partum interemerata permansit.

IX. Specialibus quidem prærogativis, & gratiæ privilegiis, propter hypostaticam cum Verbo unionem decorata fuit Christi caro; peccati fomite caruit, passiones non sensit subrepentes, & excruciantes invitum &c. eam tamen voluit Deus doloribus, ceterisque communibus humanæ naturæ infirmitatibus obnoxiam; ac Christi corpus vere passibile fuit & doloribus subditum.

X. Plura quidem in S. Hilarii scriptis, & præcipue lib. 10. de Trinit. occurrunt, quæ si juxta verborum corticem, & separatim a scopo S. Doctoris sumantur, similia parere possunt suspicionem de ejusdem doctrina circa veritatem passionis & dolorum in Christo: verum tamen, si, ut judicii æquitas postulat, ea librentur coherenter ad scopum disputationis, nec non ad testimonia alibi expressa, facile constat nullum esse fundamentum opinandi S. Hilarium asseruisse in Christo indolentiam.

XI. Nædum verum & proprium corpus assumpsit Christus, sed animam etiam humanam, mente, ac ratione præditam, quæ a primo suæ Conceptionis instanti, & perfectissima rerum omnium scientia donata fuit, & Deum intuitive vidit, non tamen comprehendit.

XII. Ex quo Verbum hominem assumpsit, & formam Servi accepit, factam esse utriusque naturæ, Divinæ scilicet, & humanæ hypostaticam unionem Catholica Fides docet. Fatendum est itaque unionem tantum esse in Christo Personam, Divinam nempe; & Beatissimam Virginem jure *θεοτοκος* sive Deiparam appellari.

XIII. Inconcussum hoc dogma evertere aggressus est Nestorius eo impietatis adductus, ut duas adstrueret personas in Christo eundemque in duos Filios dispesceret, & Virginem Mariam propriæ personæ dicendam esse negaret. Quare merito & legitime ab Ephesina Synodo damnatus fuit: nec quidquam prolium ad Nestorium ab errore purgandum momenta, quæ incassum congesserunt Albertinus, Gaillard, David de Rodone, aliique Calvinianæ factionis homines.

XIV. S. Cyrillus Nestorianam blasphemiam impugnans illibatam tenuit Catholicam Fidem, quin ullo modo in Appollinaris errorem deflecteret. Nestorii fama, & vetus consuetudo impuduit Joannem Antiochenum Antislitem, ut perditissimi hominis patrocinium fuciperet, ex quo non levis oritur de ejusdem Joannis fide suspicio: verum re attentius inspecta, personæ dumtaxat Nestorii, non errori ipsum adhaerisse constat.

XV. In hæresim Nestorianæ ediametro oppositam concessit Eutyches dogmatizans duas naturas, post adunationem, in Christo ita permixtas esse, & confusas, ut in unam coaluerint. Huic errori Catholicæ Ecclesiæ Fidem opponimus ostendentes duas naturas, post Incarnationem in Christo distinctas mansisse, inconsulas, & impermixtas, licet in eadem divina hypostasi subsistentes.

XVI. Si duæ sunt in Christo impermixtæ naturæ, idemque perfectus Deus est, & perfectus homo, necesse est, ut suæ cuique naturæ maneant impermixtæ proprietates. Duas ergo, contra Monothelitas, cum Catholica Ecclesiâ asserimus fuisse in Christo voluntates, & duplices operationes.

XVII. Plus æquo quidem, callida fraude deceptus, Sergio indulsit Honorius I. Rom. Pontifex: ipsius tamen errores nusquam admisit, aut probavit: nec quidquam confici potest ad Honorium erroris insimulandum ex iis, quæ ex VI. Synodo proferuntur.

XVIII. Admittenda est in Christo communicatio idiomatum in concreto, & respectu Personæ propter ejusdem Personæ unitatem; reiicienda vero in abstracto propter naturarum distinctam.

distinctionem. Hinc invecum a Luthero, & a Brentio subinde latius propagatum Ubiquitarum errorem damnamus.

XX. Culpanda quidem est Scytharum Monachorum impudentia, qua, infano furore perciti, omnia fusdeque vertentes, pertinaciter nimis orthodoxam ceteroquin propositionem, Unus est Trinitate passus est carne, in fidei canonem referendam contendebant: Eutychianæ tamen hæreseos labe inquinati non fuerunt.

XX. Probabilius videtur Felicem & Elipandum Nestoriano sensu duos distinguentes Filios, asservisse Christum Filium Dei adoptivum. Quacumque vero fuerit illorum mens, de qua liquido non conitat, certum est, ne quidem sub expressa humanitatis restrictione talem denominationem Christo aptari posse.

XXI. Ex pluribus, quæ circumferuntur, Chronologorum sententiis de Anno Baptismi, & Mortis Christi, eam seligimus, quæ statuit Christum baptizatum esse anno vulgaris æræ 26. ætatis suæ 30. incunte, & solido triennio in Evangelii prædicatione exacto, Cruci affixum fuisse, anno scilicet vulgaris æræ 29., ætatis suæ 33.

XXII. Hac pretiosa morte, infinito persoluto pretio, exhibuit Christus Æterno Patri pro peccatis nostris condignam, imo cumulatissimam satisfactionem; vere & proprie pro nobis satisfecit, ad strictos juris apices, & universum humanum genus redemit. Neque ab hac universalij redemptione excluduntur mulieres, quemadmodum insaniendo docuit Horatius Platus.

XXIII. Erravit cum Origene Didymus præclarum hoc Christi Reparatoris beneficium ad Angelos prævaricatores etiam, & reliquos damnatos ampliando, pro qua erronea opinione tuenda frustra præsidium querunt Origenistæ ex celebri illo testimonio quod habetur prima Petri cap. 3. v. 18. & seq.

## *De Adoratione Humanitatis Christi, Sanctorum Invocatione, Imaginum, & Reliquiarum cultu.*

I. **H**umana Christi natura hypostatice Verbo unita eodem Patriæ cultu cum Verbi Divinitate colenda est: hæc autem adoratio non humanæ naturæ præcise per se sumptæ tribuitur, sed ad suppositum terminat. Errorem propterea ingeminant plures ex Socinianis, dum Christum merum hominem esse perfide sentientes, divinos illi impendunt adorationis honores.

II. Immerito prorsus Novatores, Vigilantii, Manichæorum, & Eunomianorum hæreseos ab Orco revocantes Catholicis successent, quod Sanctos cum Christo regnantes religiosi cultu prosequantur: etenim indubium est religiosum Dulciæ cultum, quo eosdem Sanctos Catholicæ veneratur Ecclesia antiquum esse, rectum, & laudabilem.

III. Conitat Angelos, & Sanctos in Cælis, nedum pro Ecclesia Militante in genere, sed etiam speciatim pro particularibus illius membris preces ad Deum fundere; & tantum abest quod eorum invocatio Christo Mediatori injuriosa sit, ut e contra tanquam pia, & utilis merito commendetur.

IV. Putorem spurcissimum, quem ait S. Hieronymus contra Sanctorum Reliquias Vigilantium protulisse, iterato excitant nostrorum temporum Hæretici, dum simili modo per crassam ignorantiam, & calumniam, Catholicos tanquam cinerarios traducunt, & idololatrias, e quia Sacras Sanctorum exuvias licita, Religiosa veneratione colant, & antiquitus ab Ecclesiâ usurpata.

V. Haud ignotus fuit, quamvis rarius, tribus prioribus Ecclesiæ sæculis Sanctorum Imaginum usus, & cultus: multo magis invaluit quarto sæculo, & sequentibus Ecclesiâ in libertatem

2  
vindicta. Cum veteribus Jconomachis erat Dallæus, & alii moderatores Hæretici cultum hunc tanquam illicitum & superstitiosum respuentes.

## De Scientia Dei.

I. ESSE in Deo perfectissimam rerum omnium scientiam nemo sanæ mentis ambigere potest. Omnia nuda sunt, & aperta oculis ejus. Semetipsum perfecte cognoscit, & comprehendit. Nulla est creatura sive possibilis, sive præterita, sive præsens, sive futura, quæ scientiæ ipsius plenitudinem subterfugiat.

II. Intima quoque scrutatur cordium, futura creaturarum libera quæcumque sive absoluta, sive conditionata unico, & infallibili metitur intuitu: mala omnia naturæ cognoscit, mala, peccatæ, atque peccata. Et cum hæc infallibili Dei Scientia integra, & illæsa manet humana libertas.

III. Agentes de medio in quo Deus videt futura libera creaturarum, de quo gravis est in scholis controversia, ea quæ sunt ordinis mere naturalis, ab illis secernimus quæ ad ordinem supernaturalem pertinent; & primi generis futura Deum videre dicimus non in reali eorum, cum æternitate coexistentia, non in decretis suis efficacibus, & prædeterminantibus, sed in se ipsis, & in determinatione creatæ voluntatis tanquam causa. Quæ vero secundi generis sunt, etiam pro statu naturæ lapsæ, videt quidem Deus in suis Decretis tanquam in causa: verum hæc decreta scientiam conditionatorum antecedere non arbitramur, sed subsequi.

IV. Itaque ultra scientiam simpliciter intelligentiæ, & scientiam visionis, eam in Deo admitimus, quam mediam vocant; & hanc nec Scripturarum oraculis, nec Augustini authoritati adversari contendimus,

## De Gratia Dei.

I. IN statu naturæ innocentis, rectum nempe, justum, sanctum, immortalem, & aliis pluribus Gratiæ donis cumulatum in ipso creationis exordio primum hominem plasnavit Deus. Originalis hæc justitia, & reliqua dona, gratuita prorsus fuere, & supernaturalia, munificentissimi Conditoris beneficia, non ad naturalem humanæ naturæ conditionem spectantia, aut alio titulo eidem debita. Quare potuit Deus ab initio hominem in puris naturalibus condere, sine gratia, & sine peccato, nec ullatenus repugnat status naturæ puræ.

II. A primæva justitia, & sanctitate peccando excidit Adam, cujus peccatum in posteros transfusum fuisse utriusque Testamenti paginæ, necnon constans & perpetua Ecclesiæ traditio apertissime probant: neque a generali hujusmodi contagione eximuntur Regeneratorum filii, ut perperam Calvino, Zuinglio, Bucero aliisque Novatoribus visum fuit.

III. Adamo peccante statum naturæ innocentis exceperit status naturæ lapsæ, in quo, nedum bonis supernaturalibus spoliata est humana natura, verum, & in naturalibus sancita: ita ut homo lapsus, non solum ad diligendum Deum amore supernaturali; verum etiam naturali, sed affectivo super omnia, quemadmodum etiam ad implenda universa naturalis legis præcepta, omnesque tentationes vincendas speciali egeat divinæ gratiæ adjutorio.

IV. Non sic tamen concidit in homine lapso liberum arbitrium, ut sine gratia nonnisi ad peccandum valeat: imo sola adhuc sua naturali virtute generali Dei concursu munita, ne dum pluries peccatum declinare potis est, sed nonnulla quoque opera moraliter bona perficere. Multo minus requiritur fides, vel gratia habitualis, ut actio a peccato vacet; unde nec omnia Peccatorum, nec omnia Infidelium opera sunt peccata.

V. Rufini Aquilejensis præceptis imbuti hæresim suam disseminarunt Pelagius ac Cælestius.

Istis,

13

Istis, nedum ova fovit, sed & pullos exclusit Origones in libro *Περὶ ἀρχῶν* & alibi. Alter Pelagianorum Prodomus fuit Theodorus Mopsvestenus.

VI. Tradiderunt Pelagiani non indigere hominem divinæ gratiæ auxilio ad vitæ sanctimoniam, sed posse per se stare, & solis arbitrii viribus omnia declinare peccata, ac quodcumque bonum opus in ordine ad vitam æternam exequi; a quo errore, toto animo recedentes, interioris gratiæ necessitatem ad quolibet supernaturalia opera non solum perficienda, verum & incipienda cum Ecclesia Catholica vindicamus.

VII. Necessaria etiam est Dei gratia ad declinanda omnia peccata: & si de peccatis omnibus etiam venialibus collective sumptis sermo sit, eximium ad hoc requiritur divinæ gratiæ privilegium, quod nulli mortalium, sola Beatissima Virgine excepta, concessum existimamus.

VIII. Gratiam habitualement admisit quidem Pelagius; at non sensu plane recto & Catholico. De necessitate gratiæ voluntatis, & actionis diuturna exarsit controversia inter Augustinum, Ecclesiæ partes agentem, & aberrantes Pelagianos: ita vero pro necessitate hujus gratiæ decertavit S. Doctor, ut nullibi docuerit eam esse ab intrinseco efficacem; multo minus operari per victricem delectationem, quæ simplicem necessitatem inducat.

IX. Flexiloqua tergiversatione exitiosum virus occultans, Catholicumque se simulans, Diospolitani Patribus illudit Pelagius, & absolutionem subdole suffuratus est; sed hæreticum absolvendo, non modo hæresim non approbarunt præfati Patres; sed primi omnium damnarunt.

X. Pari calliditate Zosimo imponere studuit Cælestius; restamen ei ex voto non cessit: nam licet Pontifex doli adhuc nescius, lenius cum ipso agendum duxerit, nusquam ejus prava dogmata vel verbo probavit, vel facto. Quin imo agnita fraude tam Cælestium, quam Pelagium repetita auctoritate damnavit.

XI. Quanvis a nonnullis præjecta jam fuerint Semipelagianæ hæreseos semina, nihilominus circa annum dumtaxat 429, in sectam coalescere capit Semipelagianismus. Semipelagiani erroris accusantur inter alios S. Joa. Chrysostomus, Cassianus, Faustus Rejenfis, & Gennadius Massiliensis. De Chrysostomo dicimus Semipelagianismum præfocasse potius, quam docuisse, reliquos vero admittimus hac fuisse fuligine tinctos.

XII. Non in eo hæretici erant Semipelagiani, quod vellent gratiam talem esse cui posset humana voluntas resistere vel obtemperare, ut perverse docet Jansenius; sed in eo quod negarent gratiæ interioris prævenientis necessitatem ad singulos actus, & ad initium fidei.

XIII. Communis hic fuit Semipelagianorum sensus, & error, contra quem asserimus gratiæ donum esse initium fidei, & neminem posse operibus mere naturalibus divinam gratiam sibi promereri. Pactum vero a nonnullis excogitatum, quo Deus se obstrinxerit ad impertienda supernaturalia auxilia bene utentibus ratione, ac supernaturali lumine, inter commentitia, amandamus.

XIV. Præter gratiam efficacem, quæ suum semper sortitur effectum, licet non sit ab intrinseco efficax, ut nos probabiliter opinamur, admittenda est gratia vere, & proprie sufficiens, quæ plenam tribuat potentiam ad bene agendum etiam relate ad præsentis subjecti circumstantias, & cui sola sua pravitate reluctatur humana voluntas; atque erravit Jansenius asserendo quod interiori gratiæ in statu naturæ lapsæ nunquam resistitur.

XV. Urgente præcepto nulli iustorum denegatur gratia, qua illud implere possint si velint; & merito proscripta est altera Jansenii propositio, qua statuit aliqua Dei præcepta hominibus iustis volentibus, & conantibus secundum præsentem, quas habent vires impossibilia esse, & deesse illis gratiam qua possibilia fiant.

XVI. Probabilius quoque est Deum omnibus, & singulis hominibus, ne demptis quidem Infidelibus, & peccatoribus obsecratis, & obduratis præsto esse gratiæ suæ auxilio, qua, mediate saltem, & fidem, & salutem obtinere possunt.

XVII. Non

XVII. Non pro salute prædestinatorum dumtaxat mortuus est Christus; ut blasphemat Jansenius, sed semetipsum dedit redemptionem pro omnibus omnino hominibus: & tantum abest quod id asserere semipelagianum dici queat, quin veritas sit a scriptura, & Patribus discretissime tradita.

XVIII. Gratia sanctificans est Charitas Christi, quæ per Spiritum Sanctum inhabitantem diffunditur in cordibus eorum, qui iustificantur, atque ipsis inhæret. Per hanc gratiam fit ut filii Dei nominemur, & simus, vere iustificantur impii, & abluuntur peccatorum sordes, non mere teguntur: neque sola imputatione iustitiæ Christi, vel sola condonatione peccatorum iustus efficitur homo, aut quolibet alio externo favore, ut blaterant Novatores.

XIX. Ad justificationem consequendam requiritur in adultis fides, spes, & charitas; nec ea fides prodest, qua quis certo teneat sibi per Christum dimissa esse peccata. Multo minus fides huiusmodi ad Novatorum placita expressa quidquam confert, ut peccatorem certiores reddat de sua justificatione. Imo, quamvis certitudinem moralem possit homo circa id obtinere; nihilo tamen minus nullus, quandiu in hac vita degit, certus esse potest certitudine fidei, quæ excludat omnem formidinem sibi remissa esse peccata.

XX. Per bona opera quæ justificationem consequuntur, non tantum de congruo, sed etiam de condigno promeretur iustus & sanctificantis gratiæ augmentum, & vitam æternam: non tamen, saltem de condigno, meretur finalis perseverantiæ donum, ad quod obtinendum specialis requiritur gratia ab habituali, & communibus gratiæ actualis auxiliis distincta, ab ipsis etiam renatis & Sanctis enixe petenda.

## *De Divina Providentia, Prædestinatione, & Reprobatione.*

I. **R**ES humanas non fatali necessitate, vel fortuito casu contingere, sed omnia Divina Providentia regi, quæ minima quæque etiam, & viliora complectatur, adeo comperta res est, ut nonnisi, nedum manifestis Scripturarum testimoniis, & Sanctorum Patrum dictis, verum & naturali rationi aperte repugnando possit in dubium verti.

II. Præcipua, & nobilior Divinæ Providentiæ pars est Prædestinatio, quæ recte ab Augustino definitur. Præscientia, & præparatio beneficiorum Dei, quibus certissime liberantur quicumque liberantur. Admittendam esse hanc prædestinationem tam certum est, ut quemadmodum ait idem S. Augustinus Semipelagianos refellens, nemo nisi errando contra eam disputare possit.

III. Neque inde timendum est libertatis excidium. Certa siquidem est, & immutabilis Prædestinatio, certus est, & determinatus Prædestinatorum numerus: sed hac non obstante Prædestinationis certitudine, adhuc relinquitur homo, in manu consilii sui, & stat Prædestinatorum libertas.

IV. Licet omnes, & soli Prædestinati æternam beatitudinem certo, & infallibiliter consequantur; divina tamen Providentia cautum est, ut nullus, citra specialem revelationem certo scire possit se esse de numero illorum, qui prædestinati sunt.

V. Circa prædestinationis causam, tanquam erroneam reiiicimus Origenis sententiam de animarum præexistentia, & ut commentitium meritum prædestinationis comparatum ante illarum unionem ad corpora. Pelagianis quoque, & Semipelagianis contradicimus qua parte primi ex prævisis bonis naturæ operibus, alii vero ex præscientia initialis fidei, aut bonæ voluntatis ex solo libero arbitrio naturaliter prodeuntis eandem prædestinationis causam repetendam duxerunt.

VI. Certum pariter est prædestinationis motivum non esse prævisa merita etiam supernaturalia



ralia sub conditione futura. An vero efficax, & absoluta prædestinatio ad gloriam sit omnino gratuita, vel fiat a Deo dependenter a meritis supernaturalibus prævisis absolute futuris, quæstio est, quæ salva fide hinc inde libere in Scholis agitur. Nos posteriorem sententiam sequimur contententes eam nec Scripturarum, nec Augustini, nec aliorum Patrum testimoniis sufficienter impugnari.

VII. Si prædestinatio adæquate sumatur, prout tam gratiam quam gloriam complectitur, inter ipsius effectus præter vocationem, justificationem, perseverantiam finalem, & alia id genus beneficia, etiam malapœniæ, ipsamque peccati permissionem dicimus computanda: non quidam hæc perse, & ratione sui, sed per accidens, & ratione subsequen- tium bonorum, quæ Deus sua misericordia, & virtute novit ex illis eruere. Si vero inadæquate sumatur prout solum respicit gloriam, eadem gloria unicus erit ipsius effectus.

VIII. Hujuscemodi gloria nonnisi liberis Electorum meritis retribuitur, & turpiter errant Prædestinatiani asserentes quod nec pie viventibus pro- fit bonorum operum labor si ad mortem prædestinati fuerint, nec improbis obsit quod peccatis se implicant, si a Deo prædestinati fuerint ad vitam.

IX. Prædestinarianam hæresim postremis sæculis extitisse, & nunc etiam vigere in Calviniana, & Janfeniana secta, a nemine in dubium vocatur: sed dissidium viget inter eruditos utrum etiam Augustino adhuc superstitie hujusmodi error eruperit, & subsequentibus temporibus fuerit ab aliis denuo suscitatus. In hac controversia probabilius nobis videntur opinari qui censent revera Augustini ætate prædestinarianam hæresim in Adrumetino Monasterio a quibusdã fuisse propugnatam: id autem contigisse non occasione Epistolæ Augustini ad Xistum, quam Adrumetum transmiserat Florus; sed occasione libri de Gratia, & libero Arbitrio, quem per Cresconium, & Felicem ad Valentinum, aliosque Adrumetinos Monachos direxerat Augustinus.

X. Ab iis discedimus qui volunt Sedente Cælestino I. hunc errorem emeruisse in Galliis a abortivæ liquidem tunc temporis controversiæ, non prædestinarianæ hæresis Seminarium fuerunt, sed Semipelagianismi incrementum. Quinto sæculo pravi Prædestinatarum dogmatis assertorem Lucidum fuisse contendimus. Gothescalcum vero, qui 9. sæculo vixit, licet impudenter admodum se gessisse non negemus, tamen ab hujuscemodi lue immunem fuisse arbitramur.

XI. Positiva Reprobatio solum post finalia præviã demerita a Deo decernitur: ac impie sentiunt qui cum Calvino reprobationis causam in solam divinam voluntatem refundunt. Huic errori nullatenus affinis est ea Catholicorum opinio, quæ statuit, etiam quoad Fideles adultos admittendam esse ante præviã personalia demerita reprobationem negativam qua Deus aliquos ad gloriam non prædestinavit solo peccati Originalis demerito: nos tamen ab hac opinione recedimus.

## *De Angelis:*

I. **A**ngelos existere negarunt plures ex veteribus Philosophis, nihil esse existimantes in hoc Mundo, nisi quod sensu, & imaginatione apprehendi queat. In eundem errorem impeerunt inter Judæos Saducæi dicentes, non esse resurrectionem neque Angelum, neque Spiritum, ut habetur Actuum 23. Contra hos postremos, qui Sacras Scripturas admittunt, Catholica veritas de Angelorum existentia ex divina revelatione luculenter ostenditur: contra priores vero naturali ratione suaderi quidem efficaciter potest, non tamen demonstrari.

II. Circa Angelorum naturam anceps diu, & in utramque partem disceptabilis quæstio fuit, an aliquo constarent corpore nec ne, pluribus etiam Ecclesiæ Patribus diversa hinc inde opinantibus. Modo explorata res est, quamvis non absolute tanquam de fide definita, Angelos pueros esse Spiritus ex natura sua nullo corpore præditos.

III. Fide quidem certum est Angelos a Deo conditos esse, at non eadem certitudine constat quando nam, ubi, & quo in statu creati fuerint. Circa primum communis nunc temporis, & vera Theologorum sententia est Angelos cum hoc visibili Universo, non ante fuisse creatos. Circa secundum, in re admodum dubia, probabilius opinantur illi, qui pro loco creationis Angelorum Firmamentum assignant. Ad tertium quod spectat, pro certo habemus Angelos & in naturali beatitudine fuisse creatos, & ab ipso creationis exordio gratia sanctificante donatos.

IV. Præter habitualement gratiam, qua Deus Angelos ab initio exornavit, addidit etiam æstualis gratiæ dona, quibus in accepta iustitia perseverare possent si vellent, & supernaturalem beatitudinem assequi, a qua peccato superbiæ excidit Lucifer ejusque Gregales.

V. Deus Angelis peccantibus non pepercit, sed rudentibus Inferni detractos in tartarus tradidit cruciandos, ubi, æternum mansuri, cum reliquis damnatis materiali, corporeo, & perpetuo cruciabantur igne.

VI. Angelis Sanctis tanquam providis tutoribus clementissimus Deus humani generis curam demandavit: singulis Fidelibus singulos assignavit custodes: neque ab hoc peculiaris tutelæ beneficio Infideles excludi admodum probabile videtur.

## *De Actibus Humanis:*

I. **A**ctus humanos eos hic dicimus, qui ab homine rationis compote diriguntur, ad meritum, vel demeritum imputantur, & ut ait S. P. N. Bernardus, æternitatis sunt semina. Porro, ut tales sint, liberum requirunt in agente voluntatis consensum; & quidem liberum non solum a coactione, sed ea libertate quam vocant indifferentiæ activæ.

II. Libertatem istam & in homine lapsò persistere adversus Lutheranos, ac Calvinistas asserimus, & in eodem ad meritum, vel demeritum necessario exigi contra Jansenium defendimus. Falluntur autem Janseniani, seu magis fallunt, cum in suæ hæresis patrocinium advocant S. P. N. Bernardi auctoritatem: ea quippe fuit Mellisui Doctoris constans, & perpetua sententia, quod ubi necessitas est, ibi libertas non est, ubi libertas non est, nec meritum.

III. Ad libertatem de qua hic agimus ultra voluntatis consensum requiritur rationis advertentia, vel aliqualis notitia, ita ut alterutrius defectu involuntarii fiant æctus, nec ad meritum, vel demeritum possint imputari. Hinc ignorantia antecedens, & invincibilis, etiam juris naturalis si dari possit, causat involuntarium, & excusat a peccato, quod valet etiam de ignorantia invincibili concomitante, quæ licet æctum reddat solum privative involuntarium, sufficit tamen, ut operantem ex ipsa excuset a culpa.

IV. Non sic immunem a peccato agentem reddit ignorantia vincibilis: hæc enim, sicut solum (nisi sit affectata, vel supina) minuit, non tollit voluntarium, ita & peccatum. Erit vero speciale peccatum distinctum ab eo quod ex ipsa consequitur, si ignorantia circa ea vertat, quæ per se, non mere per accidens, sive ratione operis scire tenemur: si autem sit eorum, quorum scientia dumtaxat præcipitur operis adimplendi causa, non erit peccatum ab ejusdem operis omissione diversum.

V. Metus naturalis etiam gravis efficit ut opus ex eo positum sit involuntarium solum secundum quid, & voluntarium simpliciter: unde minuit quidem peccatum non tollit. Concupiscentia, seu passio antecedens sub uno respectu augeat voluntarium sub alio minuit; augeat quatenus ardentior creat in voluntate propensionem erga objectum concupitum, minuit impediendo cognitionem eorum, quæ ab objecto retrahere possunt: fecus concupiscentia concomitans, aut consequens, quæ nec voluntarium minuit, nec peccatum.

VI. Proprietates æctuum humanorum, prout spectantur in ordine morali sunt bonitas, vel malitia, unde meritum, vel demeritum consequitur. Bonitas & malitia æctuum desumuntur

ex

ex objecto, fine, & circumstantiis. Hinc asserimus primo unum, eundemque actum posse simul habere duas bonitatis, vel malitiæ species, unam ex objecto, alteram ex fine: secundò in actu qui ex objecto bonus est, malus ex fine, unicam esse moralitatem, finis nempe malitiam: tertio circumstantiam venialiter malam actui bono superadditam, nec totam ejus bonitatem destruere, nec omne meritum delere.

VII. Ut actio sit ex omni parte bona necesse non est ut ad Deum propter se dilectum referatur, sive ut fiat ex motivo Charitatis initialis proprie dictæ: debet tamen actu, vel virtute in Deum tendere tanquam ultimum finem: unde saltem per se loquendo non dantur actus indifferentes in individuo. Actus exterior in quantum est mera executio actus interioris nullam ei adjungit bonitatem, vel malitiam in ordine ad præmium, vel poenam essentialem; adjungit tamen persæpe in ordine ad præmium, vel poenam accidentalem.

VIII. Finis ultimus actuum humanorum est Beatitudo, quæ consistit in solo Deo intuitive viso, & quam qui semel adeptus fuerit, sublata feliciter potestate peccandi, in jugi, & necessario Dei amore conquiescens, perpetuo possidebit extra metum ab ea decidendi positus.

IX. In extrema judicii die resurgent mortui, sua quæque animabus copulabuntur corpora, ac in justis, & gloriosis præditi dotibus, ad Beatitudinis consortium assumentur, ut quod fuit passionis focum, sit pro modo suo comparticeps & gloriæ. Beatitudo qua donabuntur sancti mercedis rationem habebit, præmii, atque bravii: unde non in omnibus æqualis erit, ut voluit Jovinianus, sed cuique major, vel minor retribuetur pro qualitate meritorum.

X. Pastosum non est nomen meriti, ut garriunt Novatores, sed bona sunt opera per gratiam facta, quæ si justificationem præcedant, meritum habent de congruo, de condigno si eam consequantur. Licite in bonis operibus spem collocant justî consequendæ mercedis æternæ; & bene agunt dum propter hujus mercedis retributionem inclinant cor suum ad faciendas justificationes Dei.

XI. Circa conditiones ad meritum requisitas, iis rejectis quæ ab A catholicis statuuntur, contendimus ad meritum de congruo requiri ut opus sit bonum, supernaturale, idest gratiæ auxilio elicitum, liberum libertate indifferentiæ, & ab homine viatore exercitum: ad meritum vero de condigno, ultra conditiones jam positas, has ulterius necessarias esse dicimus, nempe ut gratuita Dei promissio intercedat, operans sit in statu gratiæ, & ut actus a Charitate imperetur.

XII. Proxima humanorum actuum regula est conscientia, sive judicium actuale practicum, quod habet homo in particulari de honestate, vel malitia operis, quod ei faciendum, vel omitendum proponitur. Quisquis hoc judicium sive rectum, sive erroneum contemnât agens pro libito, peccat, & quidem peccato illius gravitatis quam in ipsa actione, vel omissione apprehendit. Peccat pariter qui dubius de honestate actionis eam exequitur dubio prudente imperito.

XIII. Si dubium oriatur ex æquali rationum hinc inde pugnantium pondere, non licet sequi partem libertati faventem, sed tutior est amplectenda. Eo magis id prestandum erit quando opinio tutior fuerit etiam probabilior; & tunc solum liberum est opinionem probabilibus momentis suffultam sequi, sive libertati faveat, sive præcepto, quando nulla operanti obicitur opinio tutior æque, vel magis probabilis.

## De Legibus.

I. **Q**uemadmodum humanorum actuum proxima interna regula conscientia est, ita exteriorum eorumdem proxima norma haberi debet Lex, quæ præsuppositivè, ut Scholæ loquuntur, in actu intellectus consistit, formaliter vero in actu voluntatis.

B

II, No-

II. Notissima est Legis divisio in Æternam, Naturalem, Divinam, & Humanam. De prima egregie Augullinus ait: *ut breviter æternæ Legis notionem, quantum valeo, verbis explicem, ea est, qua iustum est, ut omnia sint ordinatissima.*

III. Lex autem Naturalis, quum concipiatur veluti radius quidam Legis Æternæ hominum cordibus impressus, ordinem naturalem conservari iubens, perturbari vetans, præscribensque quid agendum sit, quidve fugiendum ut conforme vel disforme ipsi humanæ naturæ, tantum, firmitatis & ipsa sortita est, ut ejus præcepta ne Divinæ quidem dispensationi proprie subsint, nec vera in iis locum habere possit epicheja. Si ergo Dei jussu quandoque in scripturis naturali Legi per dispensationem derogatum videtur, id non nisi mutata præcepti materia evenisse dicendum est.

IV. Quò facilius homines illum, ad quem diriguntur, finem assequi possent, in subsidium naturalis, Lex positiva Divina promulgata est, quæ in Veterem & Novam, sive Mosaicam & Evangelicam rite dispescitur. Antiquam Legem Auctori Deo adscribendam non esse, eamque nec bonam fuisse nec sanctam cum priscis quibusdam Hæreticis recentiores: Anomæi nituntur ostendere. Sed inanes esse eorum conjecturas, & ratiunculas, quas congerunt, nemo non agnoscit.

V. Quum Lex posita fuerit, donèc veniret semen, idest Christus, hinc adveniente Messia deficere debuit, quod vel ab ipsis Prophetis prænunciatum est. Isthæc igitur Lex nascente Christo ægrotare cepit, ipso autem moriente, ea quoque in se mortua est: ab hoc proinde tempore, quo abrogationis illius origo statuitur, nullam in se habuit obligandi vim, & facultatem.

VI. Ne autem Lex improbata potius, quam terminata videretur, utque Synagoga cum honore deferretur ad tumulum, legalia præcepta quantumvis mortua, inculcate tamen poterant observari, quo usque saltem per totum Orbem Evangelica lex foret sufficienter promulgata. Unde non prudenti simulatione (ut olim visum Hieronymo) sed sincero animo ab Apostolis servata fuisse Legalia defendimus; ac Capham, quem Paulus reprehendit, non alium a Petro Apostolorum Principe habendum esse, neque fiste, & ex condicto, sed vere, & ex animo redargutum fuisse, cum Augullino sentimus.

VII. Antiquæ Legi altera successit longe perfectior, Evangelium nempe, in quo ideo nonnulli veram contineri legem inficiantur, quo facilius, licentiusque suis indulgeant cupiditatibus. Singularis autem Evangelii supra veterem legem prærogativa in eo merito collocatur, quod supernaturalem gratiam adnexam habeat.

VIII. Post Evangelicam legem spectanda insuper venit Lex humana, quæ est ordinatio rationis stabilis ad publicum bonum condita, & promulgata ab eo, qui Politicæ, vel Ecclesiasticæ communitatis curam habet cum intentione subditos obligandi. Dari porro in hominibus æquam & legitimam condendarum legum civilium & ecclesiasticarum potestatem, earumque etiam, quæ obligent in conscientia, defendimus contra Novatores, qui ex vesana, malignaque de Episcopis, & de Ecclesia maledicendi prurigne, potestatem hanc in dubium revocant. Quin & actum internum directe, & per se ab Ecclesia præcipi posse propugnamus.

IX. Quamvis, ut leges obligent, earum promulgatione opus sit, quæ varia est juxta varias locorum consuetudines, falluntur tamen, qui a populorum acceptione illas pendere contendunt. Absque ea igitur subditi universi Legibus obstringuntur; quibus tenentur etiam ipsarum Latorum, licet diversa a subditis ratione. Isti enim vi coactiva, illi vero vi solum directiva ad Legem observantiam obligati censentur.

X. Quum *extra Territorium jus dicenti non pareatur impune*; hinc plane sequitur Peregrinos, & Advenas patriarum legum observantiæ (nulla tamen intercedente fraude) extra patriam non teneri; sed legibus illius, in qua morantur, Provinciæ obstringi. Quumque homines exleges esse nec possint, nec debeant, Vagis propterea leges illas sequi incumbit, quæ in locis, ubi degunt, solent observari.

XI. Quia

XI. Quia in ferendis legibus æquitatis mensura attendenda est, idcirco si pensatis omnibus, præcepti materia levis sit, gravis apponi non poterit obligatio; at vero quia præcepti obligatio a superioris pendet arbitrio, in materia etiam gravi, poterit sub levi Legisfer obligare.

XII. Consuetudo, optima censetur legum interpres: unde si rationabilis sit, & honesta, atque communi bono utilis existat, nec vero naturali; seu Divino juri adversetur, vim legis ipsa nanciscitur, & existentem aliquando abrogat legem. Nemini tamen dubitandi locus esse potest, quin per legem consuetudo valeat abrogari.

XIII. Ad commune bonum feruntur leges. Si ergo per mutationem materiæ, vel circumstantiarum inutiles fiant, aut adæquata illarum causa totius communitatis respectu desinat, leges ipsæ cessabunt.

XIV. Legis terminos explicatione sæpius indigere compertum est; imo si talis emergat circumstantia, in qua prudenter, ac rationabiliter de Legislatoris voluntate præsumatur, epicheja uti licebit.

## *De Vitiis, & Peccatis.*

I. **P**eccati nomine venit legis Divinæ violatio libera, sive actus libere factus, vel omittus contra legem æternam Dei; ex qua definitione colligitur illud omne, quod voluntarium, & liberum tollit. excusare a peccato; illud vero, quod minuit, augetve voluntarium, aut liberum, ceteris paribus minuere, vel augere peccatum.

II. Occasionem peccati proximam eam dicimus, quæ sive ex se, sive attentata speciali peccantis infirmitate, & dispositione hominem exponit morali, sive probabili peccati periculo; non autem eam solum, ut plures contendunt, in qua quis positus, semper, vel fere semper, aut plerumque, seu ordinarie peccat.

III. Distinctio peccatorum specifica desumi non debet ab oppositione legi æternæ notabiliter diversa, neque ex præceptorum diversitate; sed ex quo peccata opponantur vel diversis virtutibus, vel diversis virtutis ejusdem officiis, vel demum eidem virtuti, diverso, vel contrario modo.

IV. Omnia peccata inter se paria non sunt, & æqualia, sed quædam graviores merentur poenam, quædam leviores, & difficilius alia, alia facilius remittuntur. Inæqualitas hæc, seu gravitas peccatorum generatim desumitur ab objecto, fine, & circumstantiis, prout legi disconveniunt, vel rationali naturæ.

V. Et si certum apud omnes est ad peccatum requiri advertentiam ex parte rationis, & liberum ex parte voluntatis consensum; non conveniunt tamen Theologi, cujus generis consensus, & advertentia sit necessaria. Illorum nos opinioni subscribimus, qui ad peccandum lethaliter necessariam dicunt advertentiam formalem, & expressam non quidem malitiæ objecti, seu actus, sed alicujus inducentis dubiam saltem, & confusam malitiæ cognitionem.

VI. Ob Adam inobedientiam, quotquot homines ab hominibus consuetâ lege gignuntur, peccatores constitui, dogma Fidei est, quod adversus Pelagianos, aliosque Hæreticos firmissime ex Scripturis, & Traditione probatur. In quo autem consistat originalis peccati natura, aut quomodo peccatum hocce ex Adamo diffundatur in posteros, malumus cum Augustino discutere, quam definire.

## *De Justitia , & Jure .*

**I.** **J**ustitia , prout peculiaris est virtus quæ inter Cardinales recensetur , recte definitur a Juris peritis quod sit „ perpetua , & constans voluntas jus suum unicuique tribuendi „ Dividitur in commutativam , & distributivam ; prima est virtus unicuique tribuens quod suum , est attenta æqualitate rei ad rem juxta proportionem , quam arithmeticam dicunt , altera quæ in distributione onerum , bonorumve communium proportionem s̄rvat geometricam .

**II.** Violatæ Justitiæ distributivæ reus efficitur quicumque , vel in partitione onerum aliquos plus æquo gravat , ut aliis parcat , vel in bonorum communium distributione , ut quos maluerit abunde reficiat , alios vacuos dimittit . Lethaliter quoque peccant contra eandem virtutem , non solum qui ad Episcopatum , Ecclesias Parochiales , & alia majora Ecclesiastica beneficia eligunt , aut præstant minus dignum digniori posthabito ; sed etiam qui id præstant in collatione officiorum sæcularium , quæ gravioris sunt ponderis . Ita autem contra justitiam distributivam delinquant , ut commutativam etiam lædant , & restitutionis onere graventur , quoties vel detrimentum Communitati inde resultet , cujus incolumitati ex contractu , vel quasi contractu prospicere tenentur , vel cujuscunque Privati jus stricte sumptum lædatur .

**III.** Præcipuum juris fundamentum est dominium , quod non amittitur per peccatum , aut infidelitatem , & cujus capaces sunt parvuli , & amentes . Habet homo dominium suæ famæ , itaut possit jure suo ablatam repetere , & acquisitam citra injustitiam prodigere , modo id in alterius detrimentum non vergat : non sic ei competit absolutum dominium in propriam vitam .

**IV.** Homo alterius hominis dominus esse potest , quatenus ei licet servum facere , vel habere , nisi id peculiari lege vetetur . Hoc tamen jus dominorum in servos ultra rationabile servitium non extenditur ; & si sermo sit de servis bello captis , licite possunt isti , jure post liminii fugam arripiendo , se pristinæ libertati restituere .

**V.** Religiosi , in communi , veram habent bonorum suorum dominium : Licite possunt Clerici , si etiam quibus ex patrimonio ad victum abunde suppetit , eo non uti , & se alere ex bonis Ecclesiasticis ; liberum quoque , & absolutum dominium ipsis competere nobis videtur in bona omnia quasi patrimonialia , sicuti & in illa quæ parcius vivendo colligunt ex eis , quæ tuta conscientia in sui sustentationem impendere possent .

**VI.** An vero dominium quoque aquirant Clerici reddituum Ecclesiasticorum , quæ congruæ eorum sustentationi superfluant , varia est Theologorum , & Canonistarum sententia . Illa nobis probabilior apparet , & qua talem amplectimur , quæ decernit Clericos horum reddituum dominos non esse , sed dispensatores , adeoque teneri ex justitia eos pauperibus erogare , vel n alios pios usus impendere , itaut , si secus fecerint restituendi vinculo obstringantur .

**VII.** Legitima præscriptio justum pro utroque foro titulum præbet rem præscriptam possidendi . Nullum in rem inventam aquiritur dominium ab Inventore , sed vel domino reddenda est , si appareat , vel si post sufficientem inquisitionem non innotescat , debet inter pauperes distribui , aut ad alios pios usus deputari .

**VIII.** Restitutio in re , aut in voto , si potestas desit , necessaria est ad salutem . Ad inducendam restitutionis obligationem pro damno illato extra casum contractus , vel quasi contractus requiritur culpa theologica gravis : neque qui ex culpa levi alteri grave damnum intulit videtur obstringi posse ad reparationem totius , aut partis , saltem notabilis . Supposito vero contractu ex culpa levi juridica resultat restitutionis onus , si contractus cedat in commodum , utriusque : sufficit vero ad id culpa levissima , vel requiritur culpa lata , prout vel contractus cedit in commodum solius delinquentis , vel illius tantum , cui damnum obtingit .

**IX.** Damni

IX. Damni compenſandi obligatio oritur ex quo quis alium impediatur a confeſecutione boni eidem ex juſtitia debiti. Idem dicendum eſt ſi bonum alteri quidem debitum non ſit, ſed tamen ab eo aquirendo dolo, fraude aliove injuſto medio prohibeatur. Si vero qui alteri gratuitum, donum, vel aliud quodcumque beneficium, ſimiliter gratuitum conferre paratus erat, ſolis precibus, & ſuaſione, qualibet præſcia fraude, vi, vel dolo, ab hoc præſtando removeatur, utrumque pravo nocendi animo id fiat, nulla inde exurgit reparationis obligatio.

X. Cui ſat facultatum non ſuppetit, ut creditoribus omnibus ex integro ſatis faciat, eum ordinem in debitorum ſolutione ſervandum eſſe, communiter a Theologis aſſeritur, ut prius adimpleantur debita ex delicto, vel titulo oneroſo contracta, quam ex titulo gratuito; tum creditores qui privilegio gaudent, pro ratione privilegii, iis anteponantur, qui privilegium non habent; poſtremo debita de quibus certo conſtat prius ſolvantur quam ea de quibus dubium eſt an debita ſint. Diſſenſio eſt tamen an domino certo prius reſtituendum ſit quam incerto, licet pro utraque parte de debito conſtet; an debita ex delicto ſint prius ſolvenda quam quæ ex juſto titulo prodeunt; vel viceverſa; & utrum res credito vendita, in propria ſpecie apud debitorem extans, ante omnia creditori reddi debeat: circa quæ hæc nobis verosimiliora videntur, nimirum in primo caſu prius reſtituendum eſſe domino certo, quam incerto; in ſecundo caſu nullum ſervandum eſſe anterioritatis, vel poſterioritatis ordinem, ſed unicuique pro rata ſolvendum; in tertio vero caſu, dempta peculiari lege, vel legitima conſuetudine, nullum jus prælationis venditori competere ſupra alios creditores.

XI. Non licet rem a fure emptam eidem reddere ad recuperandum pretium datum, quando moraliter certum ſit in manu furis domino ſuo eſſe perituram.

XII. Licitum eſſe malefactores, eos etiam, quibus in Scripturis capitalis pœna expreſſe non decernitur, publica auctoritate morti addicere, non niſi perperam a quibuſdam negatum fuit. Omnia quoque jura permittunt injuſtum aggreſſorem interimere propriæ vitæ tuendæ cauſa, ſervato moderamine inculpatæ tutelæ: non ſic vero ad ſervandam famam, honorem, vel bona temporalia etiam magni momenti, quamvis aliter ſervari non poſſint.

XIII. Detraſtio, & judicium temerarium de re gravi proximum infamante, etiam ſi opinativum ſit, lethalia ſunt peccata contra juſtitiam: non tenemur tamen dubia de perſonis ſemper in meliorem partem accipere.

XIV. Quamquam qui alteri injuſte nocuit in bonis Superioris ordinis, teneatur damna realia inde emergentia reparare, & in omnibus, quantum poteſt læſum in priſtinum reſtituere: nullo tamen ſatis valido fundamento aſſeritur teneri quoque, ſi aliter nequeat, ad compenſandam per bona ordinis inferioris damna illata in bonis ordinis ſuperioris.

## De Contractibus.

I. **M**utua obligatio, quæ ultro citroque paritur in contractu, ex vero contrahentium conſenſu derivat; & nullus erit contractus niſi ſignis externis interior quoque ſungatur aſſenſus. Hinc ex defectu neceſſarii conſenſus irritus, & inanis eſt contractus, ſi error vel dolus circa ſubſtantiam rei verſetur; ſecus ſi ſolum circa qualitates, vel accidentia. Illi vero contractus quibus error, vel dolus cauſam dedit, validi quidem ſunt tam naturali jure, quam poſitivo; infirmi tamen, cum ex legum diſpoſitione ad arbitrium partis deceptæ reſcindi poſſint.

II. Metus gravis ab agente intrinſeco, vel extrinſeco, naturali, vel libero, juſte, ſive injuſte incuſſus, etiam ad extorquendum conſenſum, verum conſenſum non deſtruit, nec attentato jure naturali, per ſe loquendo, contractum invalidum reddit. At jure poſitivo plures contractus, ut matrimonium, profeſſio religioſa, promiſſio vel traditio rerum Eccleſiæ, ex metu injuſte incuſſo ad extorquendum conſenſum inti nulli declarantur & irriti; alii vero pro ſuuto illius qui metum paſſus eſt, reſcindendi.

III. Inter conditiones positivo jure in contractibus requisitas, aliquæ contractum solum illicitum reddunt, aliæ nullum: istæ, si desint, ita irritus est contractus, ut ne naturalem quidem obligationem pariat. Juramento firmatur contractus jure positivo nullus, si talis declaratus fuerit solum in gratiam boni privati, non firmatur, si immediate lex eum irritaverit propter bonum commune: juramentum autem, siue contractum firmet, siue non, semper validum erit, & servandum, quoties sit de re licita.

IV. Peccat, & ad restitutionem tenetur, qui in emptione vel venditione limites justî pretii excedit. Si res quæ venalis exponitur, occulto laboret vitio, quo vel noxia fiat, vel inutilis ad finem propter quam emitur, debet venditor, etiam non rogatus, vitium emptori aperire; secus vero, si rem nec noxiam reddat, nec notabiliter minus utilem: tunc quippe satis est, ut pro ratione vitii de pretio minuat. Potest etiam qui mercium pretium brevi auctum, vel diminutum iri privata notitia resciat, citra injustitiam illas, antequam valor augeatur, vel minuat, eo, quod tunc obtinent, pretio sibi comparare, vel vendere.

V. Illicita sunt monopolia privata auctoritate facta. Hinc justitiæ leges prævaricantur qui, vel merces omnes congerunt, ut emptores ad se compellant, & eo quo libuerit pretio vendant, vel congestas supprimunt, ut ficta inducta inopia earum pretium augeatur. Peccant quoque contra justitiam mercatores, qui mutua conventionione statuunt, ne merces nisi summo, utcumque alias justo, vendantur pretio.

VI. Quælibet usura, quæ ex mutuo vi mutui percipiatur, siue modica, siue immodica, siue a divitibus, siue a pauperibus exigatur, juri naturali, divino, & humano contraria est, & a Patribus improbat.

VII. Si debita serventur conditiones, justum præbent titulum aliquid exigendi supra sortem in mutuo lucrum cessans, & damnum emergens, probabile, & extrinsecum sortis periculum, necnon pactum pœnæ conventionalis mutuo additum. Pariter si mutuans sortis periculum in se suscipiat, potest eo titulo, habita ratione periculi, citra vetitam usuram aliquid supra sortem accipere.

VIII. Fœneratitii censendi sunt ii contractus, in quibus vi mutui obligatur mutuarius ad remutuandum in posterum quoties postulatus fuerit, ad emendum ex mutuantis officina, vel aliud quodcumque onus ei imponitur pretio æstimabile, & alias indebitum. Eadem illiciti fœneris labe fordescunt emptiones, & venditiones, in quibus, præcise, vel ob anticipatam solutionem minus justo pretio, vel ob eandem solutionem dilatam plus æquo, merces emuntur, aut venduntur.

IX. Consimili de causa, non licet chirographa certæ & facilis solutionis minoris emere, quam contineant, eo quod nonnisi post datum tempus exigi possint. Contractus quoque, quem foethra appellant, si cum eadem persona fiat, pacto retrovenditionis prævie inito, tanquam injusti jure rejicitur.

X. Ad mutuum palliatum referenda sunt cambia quæcumque sicca, quæ propterea tanquam furaria merito S. Pius V. proscripsit. Cambium quod obliquum dicunt, quoties notum sit contrahentibus pecuniam accepto mutuo respondentem non esse ad nundinas mittendam, & in ambia activa erogandam, in purum, putumque fœnus resolvitur specioso cambii nomine æstum.

XI. Improbandum non videtur pretium pro fidejussione acceptum, dummodo commensureur quantitati debiti, & qualitati periculi. Immerito census realis plurium Summorum Ponticum judicio approbatus, & omnium nationum consuetudine receptus, injustus a nonnullis censetur: & non solum veteres census sibi comparare licitum est, sed & novos instituire.

XII. Jure quidem simplicis societatis contractus tanquam legitimus admittitur: at si ei alii quo addantur, nempe assæcurationis pecuniæ in societatem collatæ, & venditionis lucri majoris incerti, pro lucro minori certo, idque cum socio fiat, æquitatis limites egreditur, & in vitiosum contractum degenerat.



## De Sacramentis in Genere .

I. **S**I quam tradunt Novatores Sacramenti definitionem ; juxta verborum corticem attendemus , sensum non videtur habere a Catholica fide alienum ; ab illa tamen cavendum est quam maxime , cum sub ejus verbis delitescat pravi dogmatis dolus : quippe qui solam moriendi , excitandique externam vim , & objectivam , nullam vero ad sanctificationem hominis efficiendam in Sacramentis , vim agnoscant .

II. Inter ceteras Sacramenti definitiones , quarum plures apud Catholicos Magistros legas , non quidem sensu , quem unum omnes habent , eumque orthodoxum , sed verbis inter se discrepantes , ea adoptari debet , quæ colligitur ex Catechismo Concilii Tridentini , estque hujusmodi . *Sacramentum in communi est signum sensibile a Deo institutum vim habens tum significandæ , tum efficiendæ in homine sanctitatis , & justitiæ .* At novæ Legis Sacramentum pressius definiri potest : signum sacrum , visibile , permanens , ex Divina institutione invisibilem gratiam significans , & ex opere operato produciens .

III. Sacramentorum existentia in quadruplici , qui distingui solet , spectari potest hominum statu . Horum primus est innocentiae , legis naturæ alter , quem excipit status legis scriptæ , ac demum legis gratiæ . Quo tempore in Protoparentibus viguit innocentiae puritas , nulla extitisse Sacramenta decernit , & jure quidem optimo major Theologorum pars . Nullis quoque , adjutos fuisse Sacramentis homines in lege naturæ viventes , propugnant ex iisdem Theologis plures . Sed plures itidem ex iis , quorum sententia nostro judicio longe probabilior est , contendunt non solum pro parvulis in eo statu datum fuisse remedium contra originale peccatum ; verum & pro adultis aliqua instituta fuisse Sacramenta .

IV. Potiori jure affirmare Nobis licet in Lege scripta extitisse aliqua veri nominis Sacramenta . Inter hæc principem tenet locum Circumcisio , quam non eo tantum fine dedit Deus Abrahamo , ejusque posteris , ut per eam a reliquis gentibus distinguerentur ; sed ut remedium etiam , quo originalis eorum culpa deleteretur .

V. Hanc autem Circumcisionis ceremoniam , cum Deus Abrahamo injunxit , novam prorsus tunc fuisse , nec apud ullos , ne quidem apud Egyptios usitatam contendimus contra Herodotum & Diodorum Siculum , quos in hac parte patrocinatur Joannes Marshamus . Abraham itaque omnium primus circumcisus est ; ex quo , non autem ab Egyptiis , ad ejus posteros , & Judæos dimanavit circumcisio .

VI. Debere , imo & reipsa in nova Lege existere Sacramenta , si Svvenchfeldum , aliosque perpaucos excipias , tamquam certum a Christianis omnibus habetur : atque in hac re Lutheranos , Calvinistas , ceterosque Hæreticos habemus nobiscum consentientes . Sed qui horum Sacramentorum numerus ? In hoc determinando dissideant inter se Novatores : Catholicorum constans & certa sententia est Sacramenta nec plura esse , nec pauciora quam septem . Hæc sunt Baptismus , Confirmatio , Eucharistia , Pœnitentia , Extrema unctio , Ordo , & Matrimonium .

VII. Inter hæc Sacramenta locum nusquam habuit , nec habere potest Lotio pedum ; imo neque ad Baptismi Sacramentum essentialiter spectat : sed ideo fuit instituta , ut exemplum foret , & exercitium humilitatis . Nec alia fuit circa Lotionem pedum sententia Sancti Ambrosii , aut S. P. Bernardi , quos contra nonnullorum criminationem suscipimus vindicandos .

VIII. Quorundam dumtaxat novæ Legis Sacramentorum Christum esse immediatum Auctorem , non omnium , tradiderunt olim ex illustrioribus Scholasticis non pauci : hos tamen errasse arbitramur , cum dubitare non liceat de immediata illorum omnium a Christo institutione . Id autem , & si pro certo habemus , non credimus tamen ad Fidei dogma pertinere .

IX. Circa Sacramentorum Ministrum, quanta Lutheri impudentia, qui inter eos vel ipsum Diabolum accensere non veretur! Rectissime igitur statuit communis Catholicorum sententia solum hominem, eumque viatorem esse quidem posse ordinarium Sacramentorum Ministrum: non singulos tamen prorsus homines quorumlibet Sacramentorum idoneos esse Ministros, sed, excepto Baptismo in casu necessitatis, illos tantum, qui per legitimam ordinationem ministerii potestatem, ejusque usum acceperunt.

X. Sacramenta, ritu tamen Evangelico consecrata, & dummodo nihil eorum desit, quæ ad ipsorum constitutionem sunt necessaria, etiam si ab improbis, scelestisque Ministris, etiam si ab Hæreticis, aut Schismaticis conferantur, valida sunt, ac legitima; quod contra Rebaptizantes antiqua docet Ecclesiæ traditio.

XI. Ignorat nemo, quot olim in Ecclesia excitaverit turbas quæstio de fide Ministri, affirmantibus hinc Cypriano, Firmiliano, pluribusque Afris, & Orientalibus Episcopis, Sacramenta ab Hæreticis collata nulla esse, & irrita; inde vero cum ceteris Episcopis reluctante Stephano Romano Pontifice, quem inter & Rebaptizantes revera esseruisse simulates, tamquam certum ratumque habemus: quidquid in oppositum ingeniose scripserit Raymundus Missorius, contendens totius Rebaptizantium historiæ architectum fuisse Arianum virum Eusebium Cæsariensem.

XII. Antequam tamen in utramque partem hæc ageretur controversia, Anabaptismum, non solum docuerant, exercuerantque Cathari, seu Novatiani, quos postea secuti sunt Donatistæ; sed rebaptizandos esse Hæreticos, cum ad Catholicam revertuntur Ecclesiam secundo desinente sæculo tradiderat præter Tertullianum, Agrippinus Cartaginensis Episcopus. Longe etiam antiquior quam in Africana, videtur fuisse hæc praxis in Ecclesia Orientali; si tamen vera sunt ex omni parte, quæ tradit Firmilianus in epistola ad Cyprianum inter Cyprianicas 75.

XIII. Quum persuasum foret Orientalibus, & Afris, Cypriano in primis, rationum pondera sui ipsorum favere sententiæ, Stephani Decreto acquiescere recusarunt. Id autem usque adeo Romani Pontificis animum commovit, ut nisi ab errore resiliirent, excommunicationem contra eos laturum se minitaretur. Proditum ab aliquibus est reipsa a Stephano in Rebaptizantes vibratum fuisse excommunicationis telum; sed nostra sententia est cum intra minas dumtaxat hæsisse.

XIV. Stephanus Anabaptismum improbens, non omnium promiscue Hæreticorum Baptisma approbavit, quod S. Pontifici affricant plures ex Novatoribus, & nonnulli etiam ex audacioribus Catholicis; immerito tamen, cum suo ipse Decreto non aliud adoptaverit Baptisma, quam verbis Evangelicis consecratum.

XV. Redintegrata Sedem Apostolicam inter & Orientales, Afrosque Episcopos pace, non ideo tamen statim cessavit error; verum apud nonnullos ex illustrioribus Præsulibus custoditus adhuc fuit. In hunc censum veniunt Dionysius Alexandrinus, Basilius, Athanasius, Optatus Milevitanus, & Cyrillus Jerosolymorum Antistes. Licet autem horum Patrum dicendi rationem, præsertim vero Athanasii, Optati, & Cyrilli emollire aliqui tentaverint, fatendum est tamen scrupulum omnem de illorum mente ab iis non tolli.

XVI. Nonnullorum etiam Theologorum usque adeo processit bona excusandi voluntas, ut quam mordicus defendit Cyprianus, & Firmilianus opinionem de rebaptizandis Hæreticis, ante mortem demum utrumque retractasse censuerint. Verum illorum rationes tanti Nobis non videntur, quæ huic retractationi gradum aliquem probabilitatis valeant conciliare. Plura quidem ad utriusque, & maxime ad Cypriani excusationem afferri possunt, cur a concepta semel opinione non duxerint esse recedendum; sed eos aliquando respuisse, plane non constat.

XVII. Quandoquidem Augustinus sæpe meminit plenarii totius Orbis Concilii, in quo definita est, & confirmata Catholica veritas circa Hæreticorum Baptisma, inquirere solent plu-

res, quando est ubi nam gentium celebratum sit hoc Concilium . Si Laicorum auidias, quem haud pauci sequuntur, Augustinus non aliud iis verbis connotavit, quam Arelatenſe primum anno 314. celebratum; ſi vero Joannem Nicolai, alioſque interroges, reſpondebunt S. Doctorem indicare voluiſſe Nicænum generale anno 325. convocatum . Cui ergo adhærendum? Nemini ſane per nos, quippe qui in hac quaſtione judicium noſtrum libenter ſuſpendimus. Si S. Auguſtinus, quod facile potuiſſet, neceſſarium non duxit, vel noluit proprio illud nomine connotare, cur nos adeo ſolliciti in eo determinando eſſe debemus?

XVIII. In oppoſitum Rebaptizantium errorem turpiter lapſi ſunt Lutherus, & Calvinus cum eorum gregalibus autumantes valere Sacramentum cum irriſione, & ſubſannatione, & ſi fieri poteſt, abique ulla Miniſtrantium deliberatione, & propoſito collatum . Contra hujusmodi Hæreticos defendendum, & merſito Catholici omnes ad Sacramenti validitatem neceſſariam eſſe intentionem Miniſtri, qua non irriſorie & mimice operetur, ſed revera in animo proponat facere, quod facit Eccleſia .

XIX. An vero ad ejuſdem Sacramenti valorem ea ſufficiat intentio, qua Miniſter ritum, hunc, quem facit Eccleſia, ſerio & attente peragere vult, tamen ſi ritum eundem intus irrideat, vel deteſtetur; nec ex iis, quæ facere vult Eccleſia, quidquam aliud facere velit, quam certa verba, certam ſupra materiam pronunciare, quæ genuina eſt Catharini ſententia, plurimum inter ſe diſſident Theologi . Nobis tamen hæc non probatur, qui in ea verſamur opinione ad Sacramenta valide conſicienda internam requiri intentionem, qua quis externum ritum ſic frequentat, ut formaliter ritum Eccleſiæ, vel in Eccleſia Sacrum velit celebrare .

XX. Haud dubium, quin intentio hujusmodi, ſi actualis fuerit, optima ſit, & quam maxime commendanda: non eſt tamen ad validam Sacramenti conſecrationem neceſſario requiſita, ſed illud plane ſubſiſtit, quam a virtuali etiam intentione Miniſter dirigitur, non ſic vero, ſi ejus intentio habitualis tantum ſit, vel interpretativa . Diverſimode ſe habet res in ſuſcipiente adulto, in quo ad Sacramentum, ejusque characterem recipiendum intentio hæc interpretativa ultro ſufficit .

XXI. Si Sacramenta in ſe ipsis ſpectentur, ſtatim ſe ſe offert eorum materia, & forma, quæ partes ſunt, quibus eadem perficiuntur . Quodlibet igitur nova Legis Sacramentum rebus tamquam materia conſtat & verbis tamquam forma . Verba autem, quæ formam Sacramentorum conſtituunt, promiſſionis non ſunt, vel concionis, quod oggerunt Novatores, ſed tantummodo Conſecrationis .

XXII. Sive Sacramentorum materiam & formam in genere dumtaxat, ſive in ſpecie inſuper determinaverit Chriſtus, quod probabilius exiſtimamus, ſummo ſtudio cavendum eſt, ne in Sacramentis conſiciendis, quidquam vel circa materiam, vel circa formam immutetur eorum, quæ ab Eccleſia ſervari ſolent . Quælibet enim, quantumvis accidentalis, quæ in iis fiat, alteratio, illicitam reddit Sacramenti collationem; quælibet vero ſubſtantialis, quæ introducat, immutatio, Sacramentum irritum reddit & caſum .

XXIII. Gratia ſanctificans præcipuus eſt Sacramentorum effectus, iſſque omnibus communis . Gratia hæc alia eſt prima, qua homo a peccatis juſtificatur, ut in Baptiſmo, & Pœnitentia: alia eſt ſecunda, qua in ſanctitate creſcit, ut in reliquis Sacramentis . Præter ſanctificantem, hæc Sacramentalem etiam produciunt gratiam, quæ adnexum habet jus ad gratias actuales, quibus Sacramenti ſinis obtineri poſſit .

XXIV. Quam conſerunt Sacramenta nova Legis gratiam iis, qui obicem non ponunt, conſerunt, ex opere operato . Utrum vero hanc producant, vel moraliter, vel phyſice, vel altero quolibet ſimili modo, aliis determinandum relinquimus .

XXV. Alter Sacramentorum effectus eſt character, quod eſt ſignum quoddam indelebile, & ſpirituale, quod fide certum eſt imprimi in Anima a tribus Sacramentis, Baptiſmo ſcilicet, Confirmatione, & Ordine; quæ proinde vi ejusdem iterari non poſſunt, ex reliquis vero quædam poſſunt, quædam etiam debent .

XXVI. In Sacramentorum administratione plures ceremonias Catholica Ecclesia non absque prudenti consilio præscripsit servandas, quæ mysticam ut plurimum, & symbolicam continent significationem. Ceremonias hæc carpere & irridere non cessant Novatores, quibus nihil eorum sapit, quod in Catholica Romana Ecclesia usu receptum sit. Nos tamen eas non solum contemni absque crimine non posse, sed nec pro libito mutari a quopiam posse, aut omitti defendimus.

## De Baptismo.

I. **I**nter novæ Legis Sacramenta primum obtinet locum Baptismus, nequam ordine, verum etiam necessitate. Sacramenti hujus institutio ad illud tempus referri probabilius debet, quo in Jordanis flumine a Joanne Baptizatus Christus, suæ purissimæ carnis contactu aquas sanctificavit, deditque illis virtutem eam producendi gratiam, quæ in Baptismo conferitur; qui propterea vel ex hoc solo capite longe præstabat Præcursoris ipsius Baptismo.

II. Ante Christi mortem, lex Baptismi, licet utilis foret, non tamen obligabat; eaque tunc solum obstringere cæpit, quum per Apostolos sufficiens facta fuit Evangelii promulgatio.

III. Sicuti in ceteris, ita & in hoc Sacramento duplex materia, remota & proxima distinguî consuevit. Sola naturalis, sive elementaris aqua est remota Baptismi materia, eaque necessaria. Non licet tamen Ministro, excepto necessitatis casu, communem aquam adhibere, sed illa aqua uti is debet, quæ solemniter in Ecclesia fuerit prius consecrata.

IV. Proxima Baptismi materia est ablutio, quæ juxta temporum diversitatem diversimode etiam in Ecclesia obtinuit. Per duodecim priora sæcula collatus ut plurimum Baptismus fuit immersione, & quidem trina: quem morem in solemnî ejus administratione adhuc servat Ecclesia Græca. A duodecimo autem sæculo immersioni substitui cæpit infusio in Latina Ecclesia in qua etiam num subsistit. Hinc liquet triam immersionem ad Sacramenti substantiam non pertinere, illudque æquo modo validum esse, sive ablutio fiat per immersionem, sive per infusionem, sive etiam per asperersionem.

V. Absoluta Baptismi forma: *Ego te baptizo &c.* haud dubium, quin antiquissima sit, & legitima. Illa similiter, quæ apud Græcos obtinet, quæque enuntiativa est, ut valida a Nobis defenditur, nec ab ea, quæ apud Latinos in usu est, substantialiter differiminatur.

VI. Ad Baptismi valorem requiritur, tum expressio actionis baptizandi, tum etiam distincta Trinitatis invocatio: alterutra enim harum conditionum in Baptismo deficiente, Baptismus ipse irritus evadit, ac nullus. Ea propter ne Apostolos quidem, quidquid in oppositum opinentur alii, in solo Christi nomine aliquando baptizasse censemus.

VII. Tantæ porro necessitatis est Baptismus, ut extra casum Martyrii, quod ejus vices suppleat, nemo absque illo sive in re, sive saltem in voto salutem consequi possit. Ne igitur tam necessarium ulli umquam deesset remedium, indulgere voluit Deus, ac permittere, ut necessitate premente quilibet homo, hæreticus licet & infidelis, Sacramentum hoc posset administrare. Ubi vero nulla urgeat necessitas, ordinaria illius ministrandi solemnî ritu potestas in Episcopis primario residet, quæ Præbyteris quoque commissa est, non tamen absque Episcopi auctoritate. Baptismus eodem modo conferre quidem valent etiam Diaconi, sed ex speciali dumtaxat delegatione.

VIII. Omnis homo non baptizatus, cujuslibet ætatis ille fuerit, vel sexus, idoneum est Baptismi subiectum. Tantum vero abest, ut non liceat Infantes ante rationis usum salutari unda ablueri, quod in Catholicis reprehendunt Valdenses, aliquæ Hæretici; quin contra hæc praxis optima sit, atque in non modicam cedat & parvulorum, & Ecclesiæ utilitas.

litate. Id autem, salva æquitate, fieri non videtur infidelium Infidelium civiliter tantum Christianis Principibus subditorum, si invitos hos esse constet. Excipiendæ sunt tamen nonnullæ circumstantiæ; sed maxime si Parvulus in imminenti mortis periculo constituitur.

IX. Quum nemo renasci possit ex aqua & Spiritu Sancto, quin sit natus; hinc si Infans materno in utero adhuc claudatur, utrumque grave & imminens sit mortis periculum, ei succurri non potest vel periclitantis matris ablutione, vel delata medio siphunculo ad delitescens corpusculum aqua. Nisi ergo Infantes aliquam sui partem emerint, nullo modo sunt baptizandi; sicuti neque Monstra, quæ humanam non referant speciem.

X. Olim solempni Baptismo conferendo, duo tantum tempora, Paschæ, & Pentecostes assignata fuisse ex vetustis Ecclesiæ monumentis apertissime liquet. Ex iisdem constat pariter Adultos non ante Sacro Fonte fuisse expiatis, quam tres Catechumenorum classes, Audientium scilicet, Genuflectentium, & Competentium laudabiliter absolvisent.

XI. Baptismi effectus est sanctificantem gratiam inducere, quæ hominem regenerat, illuminat, eumque constituit Filium Dei adoptivum. Delet proinde in omnibus illud quod ex vitiosa origine contractum est crimen: & in adultis peccata etiam actualia, tum quoad culpam, tum quoad poenam. Imprimis præterea Baptismus in anima spiritualem, & indelebilem characterem, vi cuius, semel rite collatus, iterari non potest.

XII. Contingit nonnumquam, ut Baptismi Sacramentum nihil prosit adultis ad remissionem peccatorum; & ad gratiam consequendam; si nempe in Hæresi, vel Schismate, aut ficto animo suscipiatur: *prodesse tamen incipit, ait Augustinus, quando Quis in Ecclesiæ unitate recipitur, aut deposita fitione, veraci confessione purgatur.*

## De Confirmatione.

I. Quam baptizati acceperunt in Baptismo, Fidem, & Gratiam, Confirmatione munire in iis solet Ecclesia. Ea autem non est, ut blaterant Novatores, nuda ac simplex Baptismi ceremonia, sed verum, & proprie dictum Sacramentum a Baptismo, ejusque ritu distinctum.

II. Licet Sacramentum hoc Christum ipsum, non vero Ecclesiam, ut veteres quidam Scholastici opinati sunt, habeat Auctorem, incertum est tamen, quo præcise tempore illud instituerit. Si aliqua inter plures adoptanda sit sententia, ea præ ceteris majorem habere videtur probabilitatis gradum, quæ Confirmationis institutionem ad illud tempus refert, quo Christus a mortuis rediit cum suis Discipulis conversatus est.

III. Proxima, & adæquata Confirmationis materia, non in sola manus impositione, nec in sola Chrismatismatis unctione constituenda est, sed in utraque simul. Formam similiter hujus Sacramenti essentialem non in ea oratione reponendam censemus, quæ unctionem Chrismatismatis præcedit, sed iis in verbis, quæ unctionem illam comitantur, suntque apud Latinos: *Signo te signo Crucis, confirmo te &c.*

IV. Quamvis ab hac formula non minimum distare videatur, quæ apud Græcos in usu est in suis confirmandis Neophitis; eamque ob causam ab aliquibus insufficiens reputetur & invalida; sensu tamen a nostra nihil vel fere nihil differt: ut valida proinde ipsa quoque habenda est.

V. Ordinarius Confirmationis Minister jure Divino est solus Episcopus; ex dispensatione tamen potest etiam simplex Sacerdos Sacramentum hoc administrare. Ast nullo modo idem, Confirmandi munus Diaconis, & inferioribus Clericis, multo minus Laicis jam confirmatis, extraordinaria legatione, committi posse, contra nonnullos Theologos defendimus.

VI. Ad Confirmationis subjectum quod attinet, omnes & soli Baptizati abique ullo ætatis discrimi-

discrimine unt Sacramenti hujus capaces . Præstat tamen juxta præsentem Ecclesiæ disciplinam Infantibus illud differre , nisi gravis urgeat causa , donec ad rationis usum pervenerint .

VII. Præter duplicem , quem Confirmatio producit in Confirmatis effectum , gratiæ nimirum sanctificantis augmentum , & characteris impressionem , iisdem confert etiam speciale quoddam robur , quo tentationibus contra Fidem sive internis , sive externis resistere valeant , easque superare .

VIII. Quamvis Hæretici ad Catholicam redeuntes Ecclesiam reciperentur olim , vel Christi unctioe , vel impositione manuum ; non erat tamen hic ritus repetitio Sacramenti Confirmationis , sed nuda & simplex Ecclesiæ ceremonia .

## De Eucharistia .

I. **C**hristus Dominus pridie mortis suæ vere Judaicum Pascha cum Discipulis suis celebravit , eademque die , qua ceteri Judæi , idest in mensē Nisan Luna XIV. exeunte .

II. Quod a Christo , cœna jam facta , institutum fuit Eucharistiæ Sacramentum , in Azimo potius quam in Fermentato dicendum est consecratum fuisse . Non ita vero in Consecratione usus est Christus azimo pane , ut hunc solum esse voluerit necessariam Sacramenti hujus materiam : ad substantiam quippe Sacramenti Eucharistici perinde est , sive panis azimus , sive fermentatus ; & in utroque valida est Consecratio .

III. Quum in Latina Ecclesia institutio , adhibendi azimi panis ad Eucharistiæ consecrationem assignari non possit ; sed nec in Ecclesia Græca consecrandi in fermentato commonstrari origo , merito utriusque Ecclesiæ praxis antiquissima censetur . Illud unum ex vetustis , quæ supersunt , Ecclesiasticis monumentis , licet tamquam certum colligere , Latinam Ecclesiam ante IX. sæculum , quo schisma Photianum contigit , in azymo : Græcos vero a VI. sæculo in fermentato , quasi proprio ritu consecrasse .

IV. Non sub unica tantum , sed sub duplici specie , panis nempe & vini Sacramentum hoc institui : Christus , & Apostolis , eorumque in Sacerdotali ordine successoribus consiciendum , mandavit . Quemadmodum vero pro prima specie , solum determinavit triticeum panem ; ita pro altera solum vinum de vite : Vinum autem consecrandum modica aqua temperari debet , non quidem ex Divino , sed ex Ecclesiastico tantum præcepto .

V. Verba , quibus Eucharistiam consecravit Christus , jussitque consecrari , hæc sunt essentialia , eademque formæ rationem habent . *Hoc est Corpus meum . Hic est calix Sanguinis mei .* Preces autem , quæ in Liturgiis vel præcedunt , vel subsequuntur laudata verba , sunt quidem necessaria necessitate præcepti , non tamen necessitate Sacramenti .

VI. Ex hujus Sacramenti promissione Joan. 6. , ex ipsis Consecrationis verbis , ex perpetua Ecclesiæ traditione , ex aliis insuper momentis invide contra Novatores deducitur panem in Christi Corpus , vinum in ejus Sanguinem ea mutatione converti , quam Ecclesia apto satis vocabulo Transubstantiationem voluit appellari . An non itaque delirare dicendi sunt Calviniani , qui realis præsentix Christi in Eucharistia doctrinam Paschasio Ratherto Corbejensi IX. sæculo Abbati adscribendam volunt ?

VII. Hæc ipsa realis Christi præsentia in Sacramento Altaris non manet solum , quum actu sumitur Sacramentum ; sed tamdiu perseverat , quamdiu panis , & vini species remanent incorruptæ . Merito igitur Ecclesia in Templis Eucharistiam asservat , solemniter circumgestat , eandemque Latræ cultu a Fidelibus jubet adorari .

VIII. Quæ verba instituto jam Sacramento Apostolis dixit Christus : *hoc facite in meam commemorationem* , ad Sacerdotes etiam in hac parte Apostolorum successores , imo ad eos solos

solos fuisse directa per aliorum exclusionem, qui Sacerdotali Ordine insigniti non sunt, universa semper intellexit Ecclesia. Quapropter Divino adversantur juri Hæretici illi, qui Eucharistiæ conficiendæ potestatem ad alios, præter Sacerdotes, præsumunt extendere. Soli etiam Sacerdotes sunt ordinarii Eucharistiæ dispensandæ Ministri; & quamvis hoc munus non semel Diaconis demandatum fuisse legamus; illud tamen non ex ordinaria, quæ ipsi pollerent, potestate, sed ex Ecclesiæ tantum delegatione, ejusque indulgentia exercuerunt.

IX. Eucharistiæ participatio, ut ut necessaria non sit necessitate mediæ, est tamen ad spirituale vitam fovendam, augendamque utilissima, imo vero ex Divino præcepto etiam necessaria. Prudenti igitur, sapientique ducta consilio præscripsit Ecclesia, ut omnes utriusque sexus Fideles, quum ad annos discretionis pervenerint, saltem semel in anno intra Paschales dies communicare teneantur.

X. Communio sub utraque specie simplicibus Laicis nec divina auctoritate concessa fuit, vel præscripta, neque iis ad salutem necessaria est. Si ergo Laicis olim permisit Ecclesia Eucharistiæ sumere sub utraque specie, jure suo est usa; sed jure eodem usa est, quum iustis de causis facultatem hanc ipsis subtraxit.

XI. Dum Christus Eucharistiæ instituit, ne dum Sacramentum, verum etiam novæ Legis Sacrificium instituit, quod impetratorium esse ac propitiatorium contendimus. Istud proinde in Ecclesia merito offertur tam pro Vivis, quam pro Defunctis, ut nempe iis omnibus prosit, pro quibus institutum est. Hinc sequitur pro Sanctis in Cælo regnantibus Sacrificium hoc offerri non posse; in horum tamen memoriam, & honorem rite offerri illud potest.

XII. Hujus Sacrificii essentia in sola utriusque speciei Consecratione constituenda videtur, neque ad illius integritatem, & perfectionem pertinet, aut conducit aditantum Communio; unde perperam hoc nomine Lutherani, & Calvinistæ damnant, reprobantque privatas Missas, in quibus solus communicat Sacerdos.

## *De Pœnitentia.*

I. **P**œnitentia, quam secundam post naufragium tabulam vocant Sancti Patres, verum est, & proprie dictum novæ Legis Sacramentum a Baptismo ejusque memoria distinctum, lapsis absolute necessarium ad salutem, quo a Christo facta est Ecclesiæ potestas quæcumque dimittendi peccata, ita ut nullum sit crimen, quantumvis grave, quod per Ecclesiæ claves remitti non possit.

II. Tribus Pœnitentis actibus, hoc est Contritione, Confessione, & Satisfactione quasi materia constat Pœnitentiæ Sacramentum. Contritio supernaturalis, quæ sola sufficit, & requiritur ad justificationem in Sacramento recipiendam dividitur in perfectam, & imperfectam. Perfecta etiam ante Sacramentum, hominem Deo reconciliat. Imperfecta, quæ attritio dicitur, & ea est, quæ ex Gehennæ metu, & turpitudinis peccati consideratione concipitur, si voluntatem peccandi excludat, cum spe veniæ, tantum abest, ut hominem hypocritam faciat, & magis peccatorem, quemadmodum blasphemant hæretici, quin & bona est, & ad Dei gratiam in Sacramento impetrandam disponit, ut declaravit Concilium Tridentinum. Si tamen in solo timore servili se contineat, probabilius est non sufficere ad justificationem in Pœnitentiæ Sacramento obtinendam, & ulterius requiri arbitramur quod adnexum habeat initialis Charitatis amorem.

III. Confessio lapsis post Baptismum necessaria est ad salutem, & jure divino præcepta. A primis Ecclesiæ sæculis ad hæc usque tempora ejus usus apud Catholicos semper obtinuit, & falluntur Novatores dum dicunt Sacramentalem Confessionem, aut institutam fuisse occasione

Nova-

Novatianorum, & a Nestorio Constantinopolitanae Ecclesiae Praefule abrogatam, aut in Concilio Lateranensi IV. sub Innocentio III. recenter investam.

IV. Omnia, & singula lethalia peccata, quae serio meditantium memoriae occurrunt, debent in Sacramentali confessione enuntiari: aperienda etiam sunt lethalia dubia, necnon manifestandae circumstantiae intra eandem speciem notabiliter aggravantes. Explorata res est, post Decretum Clementis VIII. non licere per epistolas, aut internuntium Confessario absenti peccata sacramentaliter confiteri; & ab eodem absente absolutionem obtinere: an autem, spectata rei natura, Confessio hoc modo instituta valida sit, ut minimum valde dubium est, & incertum.

V. Plerumque dimissa culpa, temporales poenae luendae superfluae, ad quas redimendas, sicuti etiam in peccatorum vindictam, ad satisfaciendam Deo, atque ad compensandas injurias ipsi per peccatum illatas, potest, ac debet Sacerdos confessis satisfactorias poenas injungere; & his etiam de causis poenalis satisfactio a poenitentibus in Confessione exigitur, non tantummodo, ut asserunt Novatores, ad novae vitae custodiam, infirmitatis medicamentum, Ecclesiae adificationem, & aliorum exemplum.

VI. Auctoritate a Christo derivata Sacerdos per Sacramentalem Absolutionem vere, & proprie peccata relaxat, non unice dimissa esse declarat. Solis Sacerdotibus absolvendorum criminum facultas a Christo facta est, exclusis aliis inferioribus ministris, quibus nusquam permittum fuit in Ecclesia Sacramentalem absolutionem cuiquam impertiri: ut autem Sacerdotes hac auctoritate uti liceat, & valide possint, non sufficit potestas Ordinis, sed insuper requiritur potestas jurisdictionis ordinaria, vel delegata.

VII. In mortis articulo Absolutionis beneficio illi etiam infirmi donandi sunt, qui graviore morbo correpti, inchoatum peccatorum Confessionem absolvere non valent, vel qui loquendi facultate orbati aliqua poenitentiae signa dederunt: iis vero, qui inopinato casu oppressi sensuum usu privantur, quin ullum edere possint doloris indicium, sub conditione impetitiunda erit Absolutio, dummodo catholicam professi sint religionem, nec impenitentes appareant, aut in ipso criminis actu loquelae, & sensuum usu fuerint destituti.

## *De Satisfactione imposita Poenitentibus juxta priscam Ecclesiae Disciplinam.*

I. **A**B Ecclesiae exordiis usque ad Montani aevum mitior, & brevior fuit poenitentia, quae graviorum criminum reis imponebatur. Invaluit quidem Ecclesiae rigor ejusdem Montani tempore; nundum tamen praestitutum fuit tempus, & modus agendae poenitentiae, sed id Episcoporum judicio, & prudentiae permittum est. Severius in lapsos, post exortam Novatianorum haeresein, animadvertere cepit Ecclesia; productior praefixus fuit poenitentiae terminus, & certa temporis spatia definita per varias classes & gradus evolvenda, Flentium scilicet, Audientium, Substratorum, & Consistentium.

II. Pluries quidem ante emensa hujusmodi spatia concessa fuit poenitentibus absolutio: at id nonnisi peculiaribus de causis factum fuit, ut urgente mortis periculo, imminente persecutione, timore ingruentis Schismatis, vel cum ex lapsorum reditu notabile aliquod bonum Ecclesiae redundabat, aliisque similibus in circumstantiis: ordinaria enim lege, post exactam tantummodo juxta Canonum praescripta satisfactionem, Sacramentalis absolutio conferri consuevit.

III. Non omnia lethalia peccata, sed canonica dumtaxat publicae poenitentiae legibus subdita fuisse: an vero haec eadem peccata tunc solum publica poenitentia plecterentur, quando publice patrata essent, ad Judicem Ecclesiasticum delata, atque juridice probata, non item quando mansissent occulta, dissident eruditi. Nostra sententia est sex prioribus saeculis peccata canonici-



nonica etiam occulta eidem pœnitentiæ fuisse subiecta, sed diverso modo: primo equidem pœnitentia occultis eorum criminum reis secreto a Sacerdote imponebatur, qua perfuncti secreto etiam a Sacerdote reconciliabantur: deinde si pœnitentes eam suscipere recusassent, Sacris Mysteriis publice interdicti non poterant, quemadmodum interdicebantur peccatores publici. Demum a publica pœnitentia eximebantur qui eam absque famæ iuctura, vel vitæ periculo implere non poterant. Hæc vero consuetudo imponendi pœnitentiam publicam pro peccatis occultis septimo sæculo exolevit.

IV. Clerici minores, tam ante, quam post quartum sæculum, solemnibus pœnitentiæ legibus obnoxii fuerunt. Quoad Clericos majores, tribus prioribus sæculis, varius fuit circa id in diversis Ecclesiis usus: tertio vero exacto sæculo a publica pœnitentia peragenda immunes facti sunt.

V. Quantum ad hæreticos ad Ecclesiæ gremium revertentes, non eadem semper viguit disciplina. Prioribus sæculis omnes ad pœnitentiam, & Exomologesim publicam adigebantur; quarto & sequentibus sæculis illi solum, qui intra Ecclesiam baptizati sponte in hæresim declinassent: ceteri autem extra Ecclesiam baptizati, communi lege absque huiusmodi pœnitentia admittebantur.

VI. Unica tantum vice, si crimen hæreseos excipiat, olim in Ecclesia, lapsis publicæ pœnitentiæ locus concedebatur: non proinde tamen illis, qui absolutis semel pœnitentiæ publicæ laboribus, iisdem, vel gravioribus criminibus se inquinaverant, veniæ obtinendæ spes omnino præcludebatur; sed toto vitæ suæ tempore a Dominicæ mensæ convivio segregati, secreta pœnitentia puniebantur, in fine veniam, & Communionem accepturi.

VII. Etsi aliquandiu eo disciplinæ rigor alicubi adductus fuerit, ut mæchis absolutio recusetur; in illustrioribus tamen tam Occidentis, quam Orientis Ecclesiis, nunquam sanis pœnitentia functis Sacramentalis absolutio denegata fuit; multo minus infirmis in ultimo vitæ discrimine constitutis, quoties eam postulabant.

## *De Extrema Unctione.*

I. **E**xtrema Unctio, sic dicta, quod inter unctiones in Ecclesia usurpari solitas extrema sit, eaque ad postremam adversus Dæmones luctam roborentur Fideles, verum est, ac proprium Sacramentum a Christo institutum, & a Beato Jacobo Apostolo promulgatum. Merito proinde Tridentina Synodus anathema intorsit adversus eos, qui id inficias iverint, & Extremam unctionem vel ritum tantum acceptum a Patribus, vel humanum inventum auferint appellare.

II. Nusquam Diaconis, multo minus aliis inferioribus Clericis permillum fuit in Ecclesia Extremæ unctionis Sacramentum alicui conferre; & dogma fidei est solis Sacerdotibus quos Presbyterorum vocabulo designat Beatus Jacobus in sua epistola cap. v. 14. tanquam propriis Extremæ unctionis ministris id esse reservatum.

III. Quamquam ad inungendos infirmos, quemadmodum nunc in Ecclesia Græca, ita olim in Latina, juxta variam disciplinam plures Sacerdotes advocarentur: hoc tamen non obstat, quominus ab uno tantum Sacerdote Extrema Unctio conferri legitime queat. Ut autem Sacramentum validum sit, debet idem Sacerdos, qui unctionem peragendo materiam applicat, formam correspondentem enuntiare.

IV. Remota Extremæ unctionis materia est oleum, non aliunde, quam ex olearum baccis expressum: an autem, saltem mediate, debeat esse ab Episcopo benedictum non solum ex præcepto, sed etiam ex necessitate Sacramenti, valde dubia res est, & inter Theologos controversa. Nobis pars affirmans probabilior videtur; & pro praxi secundum quod inter Monita, ad hujus Sacramenti administrationem S. Carolus proposuit, servandum exhibemus, nimirum, quod,,

quod „ Parochus, si per errorem aliud oleum, quam quod infirmorum est ad ægrotum unguendum unquam adhibuerit, etiam si Chrismatis, aut Catechumenorum sit, ut erratum emender, Olei Sacri, quod proprium infirmorum est, unctionem eidem adhibeat, tuncque Sacramenti formam iteret „ Materia proxima est olei applicatio, siue inunctio.

V. Diversa circa partes corporis Sacro Oleo liniendas obtinuit olim Disciplina. Septenarium unctionum numerum, nunc recte Romana præscribit Ecclesia: multiplex autem hæc unctio adhibenda quidem est pro tempore, & loco ex ejusdem Ecclesiæ præcepto, non tamen ad Sacramenti essentiam pertinet, & validum est Sacramentum unica tantum unctione sub universalis forma collatum. Siue vero una, siue plures adhibeantur unctiones, aptam respective adhibendo formam unicum semper a quo modo Sacramentum exurgit.

V. Aliqua verborum formula in Extremæ Unctionis Sacramento adhibenda est. Secura est, & alia quæcumque convenientior forma deprecatoria, non tamen ita necessaria, ut non consistat Sacramentum etiam si indicativa, siue absoluta usurpetur.

VI. Soli baptizati, iique adulti graviore & periculoso morbo laborantes sunt idoneum Extremæ Unctionis subjectum. Piaculum est hujus Sacramenti susceptionem negligere „ Res etenim hæc „ (ut ait Tridentinum sess. 14. & nos post ipsum contra Lutheranos, & Calvinistas defendimus) gratia est Spiritus S., cujus unctio delicta si quæ sunt adhuc expianda, ac peccati reliquias abstergit, & ægroti animam alleviat, & confirmat, magnam in eo divinæ gratiæ fiduciam excitando, qua infirmus sublevatus, & morbi incomoda, ac labores levius fert, & tentationibus Dæmonis calcaneo insidiantis facilius resistit, & sanitatem corporis interdum, uti salutem animæ expedierit, consequitur. „

## De Ordine.

I. **E**rrant Novatores dum Ordinem Sacrum e Sacramentorum albo expungunt: equidem, & verum esse Sacramentum a Christo institutum, & Ecclesiasticam Hierarchiam divino jure a laicali statu fecerni tam ex Scripturis, quam ex Traditione luculentissime constat.

II. Septem a primis sæculis in Ecclesia Latina Ordines fuerunt Ostiarius, Lectoratus, Exorcismus, Acolythatus, Subdiaconatus, Diaconatus, & Presbyteratus. Clericalis tonsura obtinuit quidem in Ecclesia ab ipsâ Apostolorum ætate: non est tamen verus Ordo. Subdiaconatus, & alii primi quatuor Ordines, si in origine considerentur divinæ sunt institutionis, eaque ratione Sacramenta appellari possunt. Diaconatus vero, & Præbyteratus, etiam per se spectati veri Sacramenti rationem habent.

III. Episcopatus nihil deest eorum, quæ ad speciale Sacramentum constituendum requiruntur: quare hunc quoque verum Sacramentum esse dicimus a Sacerdotio natura, & caractere distinctum, quo qui insigniti fuerint, jure Divino, Præbyteris, aliisque inferioribus Clericis dignitate, & potestate supereminent.

IV. De materia, & forma Ordinum Hierarchicorum, Diaconatus nempe, Præbyteratus, & Episcopatus, variæ sunt, eæque dissidentes Theologorum sententiæ. Nos illorum opinionem tuendam suscipimus, qui asserunt essentialem istorum Sacramentorum materiam in manuum impositione consistere, & formam essentialem esse orationem eidem adnexam; porrectionem vero instrumentorum, cum verbis adjunctis, quæ rite a Latina Ecclesia usurpantur, nihil aliud esse quam ejusdem materiæ & formæ ampliationem. Hinc rejicimus systema Harduini asserentis geminam, & disparem materiam, & formam pro Diaconatu, & Præbyteratu a Christo institutam esse, aliam quidem ad usum Occidentalium Ecclesiarum, aliam vero ad usum Orientalium.

V. Ordinario jure ad Episcopos tanquam supremos Ecclesiæ Præpositos, & Rectores pertinere inferiorum Ministrorum electionem, & inaugurationem, a nemine Theologorum in contr-

33  
troverſiam vocatur. Extra dubium pariter eſt poſſe Præſbyteros ex Apoſtolicæ Sedis privilegio minores Ordines legitime conferre. An autem eadem facultas Præſbyteris concedi poſſit quoad Subdiaconatum, Diaconatum, & Præſbyteratum, quæſtio eſt, quæ in utramque partem, agitur. De Præſbyteratu communior Theologorum ſententia, cui nos adhæremus, negativam partem tuetur. Quantum vero ad Subdiaconatum, & Diaconatum, horum Ordinum, conferendorum facultatem, ex Summi Pontificis diſpenſatione Præſbyteris nedum fieri poſſe, verum & factam fuiſſe aſſeveramus, atque tanquam genuinum, & validum vindicamus Privilegium ab Innocentio VIII. collatum anno 1489. v. Idus Aprilis Joanni Abbati Cistercii Diaceſis Cabillonensis, & Abbatibus quatuor Monaſteriorum quæ, poſt hæc, & immediate per dictum Monaſterium fundata erant, ne Monachi dicti Ordinis pro ſuſcipiendis Subdiaconatus, & Diaconatus Ordinibus extra Clauiſtrum hinc inde diſcurrere cogantur, ut ſuorum Monaſteriorum prædictorum Religioſis, quos ad id idoneos repererint, Subdiaconatus, & Diaconatus Ordines rite conferre valeant.

VI. Veteri lege cautum eſt, ut Episcopus nonniſi a tribus, aut ſaltem duobus Episcopis confeſecretur: hæc tamen plurium Episcoporum præſentia, juxta priſcam conſuetudinem ad ritus ſolemnitatem, & honorem Pontificatus utique ſervanda, non adeo neceſſaria eſt, ut ad Sacramenti valorem requiratur; & urgente neceſſitate, ex Apoſtolicæ Sedis diſpenſatione ab uno tantum Episcopo Electus ordinari licite, ac valide poteſt.

VII. Ordinationes a flagitiſiſ quibuliſbet hominibus, dummodo penitus inviti, & reſuſtantes non fuerint, ſuſceptæ; ab Episcopis qualibet cenſura innodatis, aut crimine pollutis, dummodo rite confeſecrati fuerint, collatæ, validæ ſunt quoad ſubſtantiam, & characterem impreſſum, ſi aliunde ea ſerventur, quæ ad eſſentiam Sacramenti pertinent.

VIII. Quidquid ſit de Anglorum Ordinationibus ex parte Parkeri, & Barlovii, de quo hic quæſtionem movere non intendimus, certum eſt Ordinationes ab Angliſ juxta rituale Eduardi VI. inſtitutas, defectu eorum quæ eſſentialia attingunt, irritas eſſe, & nullas.

IX. Solus homo baptiſmo initiatus eſſe poteſt idoneum Sacræ Ordinationis ſubjectum per excluſionem fæminarum, quibus nonniſi contra Scripturarum auctoritatem, derivatam ab Apoſtoliſ traditionem, & conſtantem Eccleſiæ praxim Sacra committere veriti non ſunt Popuziani, Collyridiani, alique vetuſtiorum temporum Hæretici. Nec quidquam in contrarium probat antiqua Diaconiſſarum inſtitutio: licet enim Eccleſiaſtico ritu fæminæ aliquot ad peculiaria circa mulieres obeunda munia deputarentur; nulla tamen eis conferebatur in Eccleſia poteſtas, & adhuc in laicorum numero computabantur. Quæ vero a Pſeudoreformatiſ referuntur de Pontificatu Joannæ, puram putamque fabulam redolent.

X. Sacram Ordinationem infantibus rationis uſum nundum adeptis, ſicuti & mente captis collatam illicitam fore conſentiunt omnes; validam eſſe quoad ſubſtantiam, & characterem, ambigunt nonnulli, plures negant: verum talia non ſunt momenta, quæ pro iſtorum opinione proferuntur, ut ab aliorum ſententia, qui pro hujusmodi Ordinationum validitate pugnant recedendum putemus.

XI. A priſmi ſæculis obtinuit quidem in Eccleſia Chorepiſcopatus; nunquam tamen pro Sacramento, aut vero Ordine, qui Præſbyteratum inter, & Episcopatum mediaret, habitus fuit; ſed merum erat officium, ad quod deputabantur Præſbyteri, qui in ſubſidium Episcoporum Pagis, & Oppidiſ præſciebantur, ut pro eorumdem Episcoporum nutu certa obirent munia, quæ ſui Ordinis poteſtatem non excederent: unde qui ad id aſſumebatur *Superior*, quaſi *ὁ ἄνω ἐπίσκοπος* appellari conſuevit. Hæc tamen non vetant, quominus aliqui extiterint Chorepiſcopi, qui veri fuerint Episcopi: equidem quamvis ex communi conſuetudine Præſbyteriſ tantum Chorepiſcopale munus committeretur, quandoque tamen peculiaribus de cauſis, ac veluti per accideſs Episcopi etiam ad id eligebantur.

XII. Inverecundius in legem Calibatus Sacriſ Miniſtriſ impoſitam invehuntur Novatores, & in Latinam Eccleſiam diſterias inde, & calumnias evomunt: etenim etiamſi jure divino præ-

præcepta non sit, æquissima tamen est, antiquissima, & tam in Sacris litteris, quam in Apostolorum exemplo certum habet fundamentum. Nec quidquam subsidii in sui erroris favorem trahere possunt ex Græcorum, & Orientalium auctoritate: sicuti enim errant dum hanc in aliis quæstionibus arroganti supercilio contemnunt; ita & falluntur, ac imponunt, dum eadem hac in parte pessime abutuntur.

## *De Matrimonio.*

I. **M**atrimonium, quod a prima Mundi conditione divinitus fuit institutum, ita contra Manichæos, Encratitas, aliosque hujus furfuris Hæreticos, per se licitum, & honestum esse defendimus, ut identidem eorum execremur errorem, qui cum Joviniano Nuptias, etiam pro tempore Evangelicæ Legis, Cælibatui anteponebant, vel æquandas contendunt. Præceptum vero de Matrimonio ineundo, quod etiam num sub aliquo respectu vigere existimamus, cum solam hominum communitatem generatim sumptam afficiat, neminem vero in particulari nunc obliget, ita illorum confodit insaniam, ut istorum blasphemiarum nullatenus patrocinetur.

II. Et si tam in Lege naturæ, quam in Lege scripta Matrimonium præsignaverit futuram, Christi cum Ecclesia conjunctionem tam physicam per Incarnationem, quam moralem per gratiam; vim tamen non habuit gratiam producendi ex opere operato: hanc quippe in Lege nova solum obtinuit, in qua a Christo ad veri, & proprie dicti Sacramenti dignitatem evectum, fuit, quod tunc probabilius contigisse dicimus, quando idem Christus in Cana Galilææ Nuptiis interfuit, eisdemque benedixit.

III. Consensus carnalis commercii ad invicem exigendi, comes est non effector Conjugii, ut ait Hugo Victorinus; & verum, ac legitimum inter S. Joseph, & Beatam Virginem intercessit Matrimonium, licet cum consensu conjugali manserit Virginitatis propositum. Multo minus ad essentiam Matrimonii spectat actualis corporum conjunctio.

IV. Non simulato, sed vero dumtaxat, & interno consensu per idonea signa manifestato perficitur conjugale fœdus. Hic autem consensus ab absentibus etiam per Procuratorem præstari potest, quo præstito ratum, & validum est Matrimonium in ratione contractus, & probabiliter etiam in ratione Sacramenti.

V. Graviter quidem peccant Filii familias, qui inconsultis Parentibus, iisdemque invititis, absque legitima causa, Matrimonia contrahunt: Noxia pariter sunt & vetita Matrimonia Orthodoxorum cum A catholicis instituta; pro utroque tamen casu, si aliunde non desint requisitæ conditiones, semel inita tenent.

V. Clandestina conjugia semper improbavit Christi Ecclesia; vera tamen fuere Matrimonia, quandiu a Tridentino Concilio nulla & irrita sunt declarata; unde post Tridentini decreta non solum illicita sunt, sed etiam nulla. Perperam vero Calvinus & Lutherus causantur Ecclesiam in hoc, sicuti & in aliis impedimentis statuendis propriæ auctoritatis limites excessisse; equidem potestatem hanc, veluti hæreditario jure Ecclesiam a Christo accepisse, omnium ætatum Traditio probat. Ita autem Ecclesiæ propria est hujusmodi potestas, ut quamvis circa Matrimonium, quod Sacramentum non est, sed contractus mere civilis, ut sunt Matrimonia Infidelium, possint Magistratus, & sæculares Principes impedimenta statuere, & causas assumere; ubicumque tamen Sacramenti dignitatem obtinuit, id ei soli competat.

VI. Circa materiam, & formam Matrimonii illorum sententiam ut vero familiorem amplectimur, qui ajunt contrahentium corpora, seu conjuges quibus nullum impedimentum, saltem dirimens contrahendi potestatem ademerit, esse ipsius materiam: formam vero esse verba legitima, id est legibus consonantia, vel loco verborum nutus, & signa quibus contrahentium assensus exprimitur, & innotescat.

VII. Quam-

VII. Quamvis, ut probabilius opinamur, in Lege veteri Matrimonii dissolutio per Libellum repudii, non tantum in Judæis tolerata fuerit, sed etiam dispensante Deo permissa, tamen in Lege Evangelica, Matrimonio semel contracto nemini licet quacumque de causa, ne excepto quidem compartis adulterio, privata auctoritate priorem uxorem dimittere, & aliam ducere, & tam arcto nexu uterque contrahentium obligatur, ut nonnisi per Monasticam alterutrius professionem in approbata Religione ab ipsis dissolvi possit; atque id solum pro casu, quo Matrimonium ratum dumtaxat fuerit, & nondum consummatum.

VIII. Indissolubile quidem manet nuptiale fœdus postquam conjuges facti sunt una caro; fas tamen est, & pluries expedit, intacto conjugii vinculo, & Ecclesiastica intercedente auctoritate, iusta de causa, divortia instituere; ac nonnisi per summam audaciam Hæretici errori vertunt Ecclesiæ, quod ob plures causas divortia, sive separationem tam quoad thorum, quam quoad habitationem, inter conjuges ad certum, incertumve tempus fieri posse decernat.

IX. Turpissimum scelus est, & naturali juri contrarium Polygamia virilis simultanea. Polygamia simultanea Uxorum permissa quidem fuit veteribus Patriarchis: at ex quo Christus in novo Fœdere, revocato ad primævam originem Matrimonio eam abrogavit, illicita facta est. Secus res se habet de Polygamia successiva; licet enim tanquam quid perfectius cum Apostolo suadeat Ecclesiæ viduis ut sic permaneant; eam tamen nusquam reprobavit, & liberum semper fuit conjugatis, ubi alteruter supremum diem obierit, ad secundas, tertias, quartas, & ultiores nuptias convolare.



# **I M P R I M A T U R**

**Si videbitur Reverendissimo Patri Sac. Palatii  
Apost. Magist.**

*Dom. Arrchiepiscop. Nicom. Vicesg.*



# **I M P R I M A T U R**

**Fr. Thom. Augustin. Ricchini Ord. Præd.  
Sacri Palatii Apost. Magist.**

